

WAAH KYA JOOD O KARAM

Wah kya Jood o Karam hai Shahe Bat-ha Tera
Nahi sunta hi nahi maangne wala Tera

Dhare chalte haiñ Ataa ke wo hai qatra Tera
Taare khilte haiñ Sakha ke wo hai zarra Tera

Farsh wale teri Shaukat ka Uloo kya jaaneñ
Khusrawa Arsh pe udta hai Pharera Tera

Aasmaañ khwaan zameeñ khwaan zamana mehmaan
Saahib e Khana Laqab kis ka hai Tera Tera

Maiñ to Maalik hi kahoonga ke ho Maalik ke Habeeb
Yani Mehboob o Muhib meiñ nahi Mera Tera

Tere Qadmoñ meiñ jo haiñ gair ka munh kya dekheñ
Kaun nazroñ pe chadhe dekh ke talwa Tera

Chor Haakim se chhupa karte haiñ yaañ uske khilaaf
Tere daaman meiñ chhupe chor anokha Tera

Dil abas khauf se patta sa uda jaata hai
Palla halka sahi bhaari hai bharosa Tera

Ek maiñ kya mere isyaañ ki haqiqat kitni
Mujh se sau lakh ko kaafi hai ishara Tera

Muft paala tha kabhi kaam ki aadat na padi
Ab Amal poochhte haiñ haaye nikamma Tera

Tere tukdoñ se pale gair ki thokar pe na daal
Jhidkiyañ khaayeñ kahañ chhord ke sadqa Tera

Meri taqdeer buri ho to bhali karde ke hai
Mehw o Isbaat ke daftar pe karoda Tera

Tu jo chahe to abhi mael mere Dil ke dhule
Ke Khuda dil nahi karta kabhi maela Tera

Kis ka munh takiye kahaan jaaiye kis se kahiye
Tere hi qadmoñ pe mit jaaye ye pala Tera

Tere sadqe mujhe ek boond bahut hai Teri
Jis din achhoñ ko mil-e jaam chhalakta Tera

Haram o Taiba wa Baghdad jidhar kije nigaah
Joat padti hai teri noor hai chhanta Tera

Teri Sarkaar mein laata hai **RAZA** us ko Shafee
Jo mera Gaus hai aur laadla beta Tera

WAAH KYA MARTABA

Wah kya Martaba Aye Gaus hai Baala Tera
Oonche Oonchoñ ke Saron se Qadam Aala Tera

Sar Bhala kya koi Jaane ke hai kaisa Tera
Auliya malte haiñ Aankheñ wo hai Talwa Tera

Kya dabe jis pe Himaayat ka ho panja Tera
Sher ko Khatre mein laata nahi Kutta Tera

Qasmein de de ke Khilaata hai Pilaata hai Tujhe
Pyara Allah Tera Chaahne wala Tera

Mustafa ke Taney Be Saaye ka Saaya Dekha
Jis ne dekha meri jaañ Jalwa e Zeba Tera

Ibne Zahra ko mubarak ho uroos e Qudrat
Qadri paayeñ tasadduq mere Doolha Tera

Kyun na Qasim ho ke Tu Ibne Abil Qasim hai
Kyun na Qadir ho ke Mukhtar hai Baba Tera

Nabavi zil Alavi burj Batooli manzil
Hasani chaand Husaini hai ujala Tera

Husn e Niyat ho khata phir kabhi karta hi nahi
Aazmaya hai yagana hai Dogana Tera

Jaan to Jaate hi Jaayegi Qayamat ye hai
Ke yahaañ Marne pe thehra hai Nazaara Tera

Tujh se Dar, Dar se Sag, Aur Sag se hai Mujh ko Nisbat
Meri Gardan mein bhi hai door ka Dora Tera

Is Nishaani ke jo Sag haiñ nahiñ Maare Jaate
Hashr tak mere gale mein rahe Patta Tera

Meri Qismat ki Qasam Khaayeñ Sagaan-e-Baghdad
Hind mein bhi hoon to deta rahoon Pehra Tera

Bad sahi Chor sahi Mujrim o Naakaara sahi
Aye wo kaisa hi sahi hai to Kareema Tera

Mujh ko Ruswa bhi agar koi kahega to Yuñhi
Ke wahi na woh **RAZA** Banda e Ruswa Tera

Haiñ **RAZA** yuñ na bilak tu nahiñ Jayyid to na ho
Sayyide Jayyide har dahar hai Maula Tera

Fakhr e Aaqaa mein **RAZA** aur bhi ek Nazm e Rafee
Chal Likha laayeñ Sana Khwaanoñ mein Chehra Tera

HUM KHAAK HAIN AUR KHAAK HI

Hum khaak haiñ aur khaak hi maawa hai hamara
Khaaki to wo Aadam jadde Aala hai hamara

Allah hameñ khaak kare apni talab mein
Ye khaak to Sarkaar se tamga hai hamara

Jis khaak pe rakhte the qadam Sayyide Aalam
Us khaak pe qurbaañ dil e shaida hi hamara

Kham ho gayi pusht e falak is ta'ane zameen se
Sun hum pe Madina hai wo rutba hai hamara

Us ne laqabe khaak Shahenshaah se paaya
Jo Haidare Karraar ke Maula hai hamara

Aye Muddaiyo! Khaak ko tum khaak na samjhe
Is khaak mein madfoon shahe bat-ha hai hamara

Hai khaak se taameer, mazaar e Shahe kaunain
Ma'moor isi khaak se qibla hai hamara

Ham khaak udayeinge jo wo khaak na paayi
Aabaad **RAZA** jis pe Madina hai hamara

GAM HO GAYE BESHUMAAR AAQA

Gam ho gaye beshumaar Aaqa
Banda tere nisaar Aaqa

Bigda jaata hai khel mera
Aaqa Aaqa sañwaar Aaqa

Mañjdhaar pe aake naav doobi
de haath ke hoon main paar Aaqa

Tooti jaati hai peeth meri
Lillah ye bojh utaar Aaqa

Halka hai agar hamara palla
Bhaari hai tera waqaar Aaqa

Mujhsa koi gamzada na hoga
Tum sa nahi gamgusaar Aaqa

Tum woh ke karam ko naaz tumse
Main woh ke badee ko aar Aaqa

Jiski marzi Khuda na taale
Mera hai wo naamdaar Aaqa

Itni Rehmat **RAZA** pe kar lo
La Yaqrubuhul Bawaar Aaqa

LUTF UN KA AAM HO HI JAYEGA

Lutf un ka Aam ho hi jayega
Shaad har naakaam ho hi jayega

Jaan dedo waada e deedar par
Naqd apna daam ho hi jayega

Be nishaanon ka Nishaan mit-ta nahiñ
Mit-te mit-te naam ho hi jayega

Yaade gesoo zikr e Haq hai aah kar
Dil mein paida laam ho hi jayega

Ek din aawaz badleinge ye Saaz
Cheh-chaha Kohraam ho hi jayega

Saailo daaman sakhi ka thaam lo
Kuchh na kuchh In'aam ho hi jayega

Yaad e abru karke tadpo Bulbulo!
Tukde tukde daam ho hi jayega

Mufliso! un ki gali mein ja pado
Baag e Khuld ikraam ho hi jayega

Gam to unko bhulkar lipta hai yun
Jaise apna kaam ho hi jayega

Aqilo! unki nazar seedhi rahe
Bouroñ ka bhi kaam ho hi jayega

Ab to laai hai shafa'at afwa par
Badhte badhte aam ho hi jayega

Aye **RAZA** har kaam ka ek waqt hai
Dil ko bhi aaram ho hi jayega

LAM YAATI NAZEERUKA FEE NAZARIN

Lam yaati nazeeruka fee nazarin misle to na shud paida jaana
Jag raaj ko taaj tore sarso hai Tujhko shahe doosara jaana

Albahru ala wal mauju tagaa mann bekas o toofañ hosh ruba
Manjhdar mein hooñ bigdi hai hawa mori nayya paar laga jaana

Ya shamsu nazarti Ila lailee chu ba taiba rasi arze ba kuni
Tori jot ki jhaljhal jag mein rachi mori shab ne na din hona jaana

Laka badrun fil wajhil ajmal khat hala e mah zulf abre ajal
Tore chandan chandra paro kundal rehmat ki bharan barsa jaana

Ana fee atashinw wa sakha ka atam aye gesuye paak aye abre karam
barsan haa re rimjhim rimjhim do boond Idhar bhi gira jaana

Ya qafilatee zeedee ajalak rahme bar hasrate tishna labak
Mora jiyara larje darak darak taiba se abhi na suna jaana

Al qalbu Shahinw wal hammu shujooñ dil zaar chunañ jaañ zere chunooñ
Pat apni bipat main ka se kahooñ mora kaun hai tere siwa jaana

Arruhu fida ka fazid harqaa yak shola digar barzan ishqa
Mora tan man dhan sab phoonk diya ye jaan bhi pyare jala jaana

Bas khama e khaame nawa e **RAZA** na ye tarz meri na ye rang mera
Irshad e ahibba naatiq tha naachaar is raah pada jaana

NE'AMTEIÑ BAÑT-TA JIS SAMT WO ZEESHAN GAYA

Ne'amateiñ Bañt-ta jis samt wo zeeshan gaya
Saath hi munshi e rehmat ka qalamdaan gaya

Le khabar jald ke gairoñ ki taraf dhyan gaya
Mere Maula mere Aaqa tere qurbaan gaya

Aah wo aañkh ke naakaame tamanna hi rahi
Haaye wo dil jo tere dar se pur armaan gaya

Dil hai wo dil jo teri yaad se ma'moor raha
Sar hai wo sar jo tere qadmoñ pe qurbaan gaya

Unheĩ jana unheĩ maana na rakha gair se kaam
Lillahil hamd main duniya se musalmaan gaya

Aur tum par mere aaqa ki inayat na sahi
Najdiyo! kalma padhaane ka bhi Ehsaan gaya

Aaj le unki panaah aaj madad maang unse
Phir na maaneñge qiyamat mein agar maan gaya

Uf re munkir ye badha joshe ta'assub aakhir
Bheed mein haath se kam bakht ke imaan gaya

Jan o dil hosh o khirad sab to Madine pahuñche
Tum nahi chalte **RAZA** saara to saamaan gaya

SAR KATAATE HAIÑ TERE NAAM PE MARDANE ARAB

Taab e Mir-aate Saher gard e biyaabaan e Arab
Gaaza e Rooye Qamar dood e charaagaan e Arab

Allah Allah bahaar e Chamanistaane Arab
Paak haiñ laus e khizaañ se gul o rehaan e Arab

Tishna e Nehr e Jinaañ har arabi o ajami
Lab e har nehr e jinaañ tishna e neesaane Arab

Arsh se muzda e bilqees e shafa'at laaya
Taair e sidrah nasheen murg e sulemaan e Arab

Husn e Yusuf pe kateen misr mein angusht e zanaañ
Sar kataate haiñ tere naam pe Mardaan e Arab

Koocha koocha mein mahekti hai yahaañ boo e qamees
Yusufistaan hai har ek gosha e kan'aan e Arab

Bazm e Qudsi mein hai Yaad e Lab e jaañ bakhsh e huzoor
Aalam e Noor mein hai chashma e hayaawaan e Arab

Paaye Jibreel ne Sarkaar se kya kya Alqaab
Khusra o khail e malak khaadim e Sultaan e Arab

Hoor se kya kaheñ Moosa se magar arz kareñ
Ke hai khud husn e azal taalib e jaanaan e Arab

Karam e Naat ke nazdeek to kuchh door nahiñ
Ke **RAZA** e Ajami ho Sage Hassaan e Arab

ZAHE IZZAT O AETLA E MOHAMMED e

Zahe Izzat o Aetla e Mohammed e
Ke hai arshe haq zere paaye Mohammed e

Makaan arsh unka falak farsh unka
Malak khaadimaan e saraa e Mohammed e

Khuda ki raza chaahte haiñ do Aalam
Khuda chaahta hai Raza e Mohammed e

Mohammed baraa e Janaab e Ilahi
Janaab e Ilahi baraa e Mohammed e

Dum e Naz'a jaari ho meri zubaañ par
Mohammed Mohammed Khuda e Mohammed e

Asaa e kaleem azdahaa e gazab tha
Giron ka sahara asaa e Mohammed e

Maiñ Qurban kya pyari pyari hai nisbat
Ye Aane Khuda wo Khuda e Mohammed e

Khuda un ko kis pyaar se dekhta hai
Jo Aankheñ haiñ mehwe liqa e Mohammed e

Ijabat ne jhuk kar gale se lagaya
Badhi naaz se jab dua e Mohammed e

Ijabat ka sehra Inayat ka joda
Dulhan banke nikli dua e Mohammed e

RAZA pul se ab wajd karte guzariye
Ke hai rabbe sallim sadaa e Mohammed e

AYE SHAAFA E UMAM

Aye Shaafa e Umam shahe zee Jaah le khabar
Lillaah le khabar meri Lillaah le khabar

Dariya ka josh naav na beda na nakhuda
Maiñ Dooba, tu kahañ hai mere shah le khabar

Pahuñche pahuñchne wale to manzil magar shaha
Un ki jo thak ke baithe sare raah le khabar

Wo sakhtiyaañ sawaal ki wo soorateiñ muheeb
Aye gamzadon ke haal se aagah le khabar

Mujrim ko baargahe Adalat mein laaye haiñ
Takta hai bekasi mein teri raah le khabar

Ahle amal ko un ke amal kaam aayenge
Mera hai kaun tere siwa aah le khabar

Baahar zubaneñ pyaas se haiñ aafat garm
Kausar ke Shah Kassaruhullaah le khabar

Maana ke sakht mujrim o naakaara hai **RAZA**
Tera hi to hai banda e dargaah le khabar

BANDA QAADIR KA BHI QAADIR BHI HAI

Banda Qaadir ka bhi Qaadir bhi hai Abdul Qaadir
Sirr e baatin bhi hai zaahir bhi hai Abdul Qaadir

Mufti e shara'a bhi hai qaazi e millat bhi hai
Ilm e asraar se maahir bhi hai Abdul Qaadir

Mamba e faiz bhi hai majma e afzaal bhi hai
Mehr e irfaan ka munawwar bhi hai Abdul Qaadir

Qutb Abdaal bhi hai mehwar e irshaad bhi hai
Markaz e daaira e sirr bhi hai Abdul Qaadir

Zi tasarruf bhi hai maazoon bhi mukhtaar bhi hai
Kaar e Aalam ka mudabbir bhi hai Abdul Qaadir

Rashk e bulbul hai **RAZA** lala e sad daag bhi hai
Aap ka wasif o zaakir bhi hai Abdul Qaadir

GUZRE JIS RAAH SE

Guzre jis raah se wo Sayyide waala hokar
Reh gayi saari zameen ambar e saaraa hokar

Rukhe anwar ki tajalli jo qamar ne dekhi
Reh gaya bosa dehe naqsh e kafe pa hokar

Waa e Mehroomi e qismat ke main phir ab ki baras
Reh gaya hamrahe zawwaare Madina hokar

Chaman e Taiba hai wo baagh ke murge sidraah
Barson chehke hain jahan bulbule shaida hokar

Gosh-e-sheh kehte hain faryaad rasi ko hum hain
Vaada e chashm hai bakhshayeinge goya hokar

Paaye sheh par gire ya Rab tapishe mehr se jab
Dil e betaab ude hashr mein paara hokar

Hai ye ummid **RAZA** ko teri rehmat se shaha
Na ho zindaani e dozakh tera banda hokar

SARTAABA QADAM HAI

Sartaaba qadam hai taney Sultane e Zaman phool
Lab phool, dahan phool, zaqan phool, badan phool

Sadqe mein tere baag to kya laaye hain ban phool
Is guncha e dil ko bhi to eima ho ke ban phool

Tinka bhi hamare to hilaaye nahi hilta
Tum chaaho to ho jaaye abhi kohe mihan phool

Wallah jo mil jaaye mere gul ka paseena
Maange na kabhi itr na phir chahe dulhan phool

Dandano labo zulfo rukhe sheh ke fidaai
Hai durre Aden la'ale Yemen mushke khutan phool

Dil apna bhi shidaai hai us naakhune paa ka
Itna bhi mahe nav pe na aye charkhe kuhan phool

Kya Gaazah malaa garde Madina ka jo hai aaj
Nikhre huwe joban mein qayamat ki phaban phool

Kya baat **RAZA** us chamanistaane karam ki
Zehra hai kali jis mein Husain aur Hasan phool

HAI KALAAM E ILAAHI MEIN

Hai kalaam-e-Ilaahi mein Shams o Duha tere chehra e noor e fiza ki qasam
Qasam e shabe taar mein raaz ye tha ke habeeb ki zulfe dota ki qasam

Tere khulq ko Haq ne azeem kaha Teri khalq ko Haq ne jameel kiya
Koi tujh sa huwa hai na hoga shaha tere Khaaliqe husn o ada ki qasam

Wo khuda ne hai martaba tujh ko diya na kisi ko mile na kisi ko mila
Ke Kalaam e Majeed ne khaai shaha Tere shahr o kalaam o baqaa ki qasam

Tera masnade naaz hai arshe bareeñ Tera mehrame raaz hai roohe ameeñ
Tu hi sarware har do jahañ hai shaha Tera misl nahiñ hai Khuda ki qasam

Yahi arz hai khaaliq e arz o samaa wo Rasool haiñ tere maiñ banda tera
Mujhe unke jawaar meiñ de wo jagaah ke hai khuld ko jis ki safaa ki qasam

Tu hi bandoñ pe karta hai lutf o ataa hai tujhi pe bharosa tujhi se dua
Mujhe Jalwa e paak Rasool dikha tujhe apne hi izz o ula ki qasam

Mere garche gunaah haiñ had se siwa magar un se ummeed hai tujh se Rajaa
Tu Rahim hai Unka karam hai gawaah wo karim haiñ teri ata ki qasam

Yahi kehti hai bulbule baage jinaañ ke **RAZA** ki tarah koi sehr bayaañ
Nahiñ hind meiñ waasif e Shaa he Huda mujhe shokhiye tab'ae **RAZA** ki qasam

PAAT WO KUCHH DHAAR YE

Paat wo kuchh dhaar ye kuchh zaar hum
Ya Ilahi kyuñkar utre paar hum

Kis balaa ki mai se haiñ sarshaar hum
Din dhala hote nahiñ hushiyaar hum

Dushmano ki Aañkh meiñ bhi phool tum
Dostoñ ki bhi nazar meiñ khaar hum

Lagzishe pa ka sahara ek tum
Girne wale laakhoñ, naa-hanjaar hum

Sadqa apne baazuoñ ka al madad
Kaise todeiñ ye bute pindaar hum

Dum qadam ki khair aye jaan e Maseeh
Dar pe laaye haiñ dil e beemar hum

Apni rehmat ki taraf dekheñ huzoor
Jaante haiñ jaise haiñ badkaar hum

Apne mehmanoñ ka sadqa ek boond
Mar mite pyase idhar sarkaar hum

Haath uthakar ek tukda aye kareem
Haiñ sakhi ke maal meiñ haqdaar hum

Ba ata tum, shah tum, mukhtaar tum
Be nawa hum, zaar hum, naachaar hum

Apni Sattari ka ya Rab waasta
Hoñ na ruswa bar sar e darbaar hum

Itni arze aakhiri keh do koi
Naav tooti aa pade mañjdhaar hum

Sunniyat se khatke sab ki aañkh meiñ
Phool hokar ban gaye kya khaar hum

Dil ke tukde nazr-e-haazir laaye haiñ
Aye sagaane kucha e dildaar hum

Un ke aage daawa e hasti **RAZA**
Kya bake jaata hai ye har baar hum

POOCHHTE KYA HO ARSH PAR

Poochhte kya ho arsh par yuñ gaye Mustafa ke yuñ
Kaif ke par jahañ jaleiñ koi bataaye kya ke yuñ

Qasre dana ke raaz meiñ aqleiñ to gum haiñ jaisi haiñ
Rooh e quds se poochhiye tum ne bhi kuchh suna ke yuñ

Maine kaha ke jalwa e asl mein kis tarah gumein
Subh ne noor e mehr mein mit ke dikha diya ke yun

Dil ko de noor o daage ishq phir main fida do neem kar
Maana hai sun ke shaq e maah aankhon se ab dikha kyun

Dil ko hai fikr kis tarah murde jilatey hain Huzoor
Aye main fida laga kar ek thokar ise bataa ke yun

Baag mein shukr e wasl tha hijr mein haye haye gul
Kaam hai un ke zikr se khair wo yun huwa ke yun

Jo kahe she'r o paas-e-shar'aa dono ka husn kyun kar aaye
La use peshe jalwa zamzama e **RAZA** ke yun

PHIR KE GALI GALI TABAAH

Phir ke gali gali tabaah thokarein sab ki khaayein kyun
Dil ko jo aql de khuda Teri gali se jaayein kyun

Rukhsat e qaafila ka shor gash se hamein uthaye kyun
Sote hain unke saaye mein koi hamein jagaaye kyun

Baar na the habib ko paalte hi garib ko
Roiyein jo ab naseeb ko chain kaho gawnaye kyun

Yaad e Huzoor ki qasam gaflat e aish hai sitam
Khoob hain qaid e Gam mein hum koi hamein chhurdaaye kyun

Dekh ke hazrat e gani phail pade faqeer bhi
Chhai hai ab to chhaawni Hashr hi aa najaaye kyun

Jaan hai ishq e Mustafa roz fazun kare Khuda
Jis ko ho dard ka mazaa naaz e dawa uthaye kyun

Ab to na rok aye gani aadate sag bigad gayi
Mere Kareem pehle hi luqma e tar khilaye kyun

Sang e dare huzoor se hum ko khuda na sabr de
Jana hai sar ko ja chuke dil ko qaraar aaye kyun

Hai to **RAZA** nira sitam jurm pe gar lajayein hum
Koi bajaye soz e gam saaz e tarab bajaye kyun

AHLE SIRAT ROOH E AMEEN KO KHABAR KAREIN

Ahle Sirat Rooh e Ameen ko khabar karein
Jaati hai Ummat e Nabvi farsh par karein

Bad hain to aap ke hain bhale hain to aap ke
Tukdon se to yahan ke pale rukh kidhar karein

Sarkar hum kamino ka atwaar pe na jayein
Aqa Huzoor apne karam par nazar karein

Un ki haram ke khaar kasheeda hain kis liye
Ankhon mein ayein sar pe rahein dil mein ghar karein

Jaalon pe jaal pad gaye lillaah waqt hai
Mushkil kushai aap ke naakhun agar karein

Kilk e **RAZA** hai khanjar e khuinkhaar barq baar
Aa'da se kehdo khair manaayein na shar karein

WO SUYE LAALA ZAAR PHIRTE HAIN

Wo suye laalazaar phirte hain
Tere din aye bahaar phirte hain

Jo tere dar se yaar phirte hain
Dar badar yun hi khwaar phirte hain

Aah kal aish to kiye humne
Aaj wo beqaraar phirte hain

Us gali ka gada hoon mein jis mein
Maangte tajdaar phirte haiñ

Jaan hai jaan kya nazar aaye
Kyun adu girde gaar phirte haiñ

Phool kya dekhuñ meri aankhon mein
Dasht e Taiba ke khaar phirte haiñ

Lakhoñ qudsi haiñ kaam khidmat par
Lakhoñ gird e mazaar phirte haiñ

Rakhiye jaise haiñ khana zaad haiñ hum
Mol ke aib daar phirte haiñ

Haaye gaafil wo kya jaga hai jahan
Paanch jaate haiñ chaar phirte haiñ

Baeiñ raste na jaa musafir sun
Maal hai raah maar phirte haiñ

Koi kyun poochhe teri baat **RAZA**
Tujh se kutte hazaar phirte haiñ

UNKI MAHEK NE DIL KE

Unki Mahek ne dil ke guñche khila diye haiñ
Jis Raah Chal gaye haiñ kooche basaa diye haiñ

Jab Aa gayi haiñ joshe rehmat pe un ki aañkheñ
Jalte bujha diye haiñ rote hañsa diye haiñ

Ek dil hamara kya hai aazaar is ka kitna
Tum ne to chalte phirte murde jila diye haiñ

Un ke nisaar koi kaise hi ranj mein ho
Jab yaad aa gaye haiñ sab gam bhula diye haiñ

Hum se faqeer bhi ab pheri ko uth-te honge
Ab to gani ke dar par bistar jamaa diye haiñ

Asra mein guzre jis dum bed pe qudsiyon ke
Hone lagi salaami parcham jhuka diye haiñ

Aane do ya dubo do ab to tumhari jaanib
Kashti tumheñ pe chhodi langar utha diye haiñ

Doolha se itna keh do pyaare sawaari roko
Mushkil mein haiñ baraati purkhaar baadiye haiñ

Allah kya jahannam ab bhi na sard hoga
Ro ro ke Mustafa ne dariya bahaa diye haiñ

Mere kareem se gar qatra kisi ne maanga
dariya bahaa diye haiñ dur be bahaa diye haiñ

Mulk e sukhan ki shaahi tum ko **RAZA** musallam
Jis samt aa gaye ho Sikke bitha diye haiñ

SACHCHI BAAT SIKHATE YE HAIN

Sachchi baat Sikhaate Ye Haiñ
Seedhi Raah Dikhaate Ye Haiñ

Doobi Naav Tiraate Ye Haiñ
Hilti Neeveiñ Jamaate Ye Haiñ

Tooti Aaseiñ Bandhaate Ye Haiñ
Chhooti Nabzeiñ Chalaate Ye Haiñ

Jalti jaaneñ Bujhaate Ye Haiñ
Roti Aañkheñ Hañsaate Ye Haiñ

Qasr e Danaa tak Kis ki Rasaai
Jaate Ye haiñ Aate ye haiñ

Us ke Naayib Unke Saahib
Haq se Khalq Milaate Ye Haiñ

Shaaf'e Naaf'e Raaf'e Daaf'e
Kya Kya Rehmat Laate Ye Haiñ

Shaafa e Ummat Naafa e Khalqat
Raafa e Rutbe Badhaate Ye Haiñ

Faiz e Jaleel Khaleel Se Puchho
Aag mein Baag Khilaate Ye Haiñ

In ke naam ke Sadqe Jis se
Jeete hum haiñ jilaate Ye Haiñ

Us ki bakhshish In ka Sadqa
Deta Wo hai Dilaate Ye Haiñ

Un ka Hukm Jahaan mein Naafiz
Qabza Kul pe Rakhaate Ye Haiñ

Qadire Kul ke Naayib-e-Akbar
Kun ka Rang Dikhaate Ye Haiñ

Un ke Haath mein har Kunji hai
Maalik e Kul Kehlaate Ye Haiñ

Inna Aa'taina Kal Kausar
Saari Kasrat Paate Ye Haiñ

Rab hai Mo'ati ye haiñ Qaasim
Rizq uska hai Khilaate Ye Haiñ

Maatam Ghar mein ek Nazar mein
Shaadi Shaadi Rachaate Ye Haiñ

Apni bani hum aap bigaadein
Kaun Banaaye Banaate Ye Haiñ

Lakhoñ balaayein Karoron Dushman
Kaun Bachaaye Bachaate Ye Haiñ

Bande karte haiñ Kaam Gazab ke
Muzda Raza ka Sunaate Ye Haiñ

Naz'a mein Rooh mein Aasaani dein
Kalma Yaad dilaate Ye Haiñ

Marqad mein bandoñ ko thapak kar
Meethi Neend Sulaate Ye Haiñ

Baap jahaan Bete se Bhaage
Lutf Wahaan Farmaate Ye Haiñ

Maa jab ek lautey ko chhode
Aa Aa keh ke Bulaate Ye Haiñ

Sankho Bekas rone wale
Kaun Chupaaye Chupaate Ye Haiñ

Khud Sajde mein gir kar apni
Girti Ummat Uthaate Ye Haiñ

Nange be nango ka parda
Daaman dhak ke chhupaate ye haiñ

Apne bharam se hum halkoñ ka
Palla bhaari banaate Ye Haiñ

Thanda Thanda Meetha Meetha
Peete hum haiñ Pilaate Ye Haiñ

Sallim Sallim ki dhaaras se
Pul par hum ko chalaate Ye Haiñ

Jis ko na koi khulwa sakta
Wo Zanjeer Hilaate Ye Haiñ

Jin ke chhappar tak nahiñ unke
Moti Mahal Sajwaate Ye Haiñ

Topi jinki na Jooti unko
Taaj o Burraq Dilaate Ye Haiñ

Kehdo **RAZA** se Khush ho Khush Reh
Muzda **RAZA** ka Sunaate Ye Haiñ

WO KAMAAL E HUSN E HUZOOR HAI

Wo kamaal e husne Huzoor hai ke gumaan ne naqs jahaan nahiñ
Yahi phool khaar se door hai yahi Shamma hai ki dhuwaañ nahiñ

Do jahaan ki behtariya nahiñ ke amaani e dil o jaañ nahiñ
Kaho kya hai wo jo yahaan nahiñ magar ek nahiñ ke wo haañ nahiñ

Maiñ nisaar tere kalaam par mili yuñ to kis ko zabaañ nahiñ
Wo sukhan hai jis mein sukhan na ho wo bayaañ hai jis ka bayaañ nahiñ

Bakhuda Khuda ka yahi hai dar nahi aur koi mafar maqar
Jo wahaañ se ho yahiñ aake ho jo yahaan nahiñ to wahaañ nahiñ

Tere aage yuñ haiñ dabe lache fusaha Arab ke bade bade
Koi jaan e munh mein zabaañ nahiñ, nahiñ balki jism mein jaañ nahiñ

Wahi noor e Haq wahi zille Rab, hai unhiñ se sab hai unhiñ ka sab
Nahiñ unki milc mein aasmaañ ki zameeñ nahi ke zamaañ nahiñ

Wahi la makaañ ke makeeñ huye sar-e-arsh takht nasheeñ huye
woh Nabi hai jis ke haiñ ye makaan wo Khuda hai jis ka makaañ nahiñ

Sar e arsh par hai teri guzar dil e farsh par hai teri nazar
Malakut o mulk mein koi shai nahiñ wo jo tujh pe ayaañ nahiñ

Karooñ tere naam pe jaañ fida na bas ek jaañ do jahaan fida
Do jahaan se bhi nahiñ ji bhara karooñ kya karoroñ jahaan nahiñ

Karoon madh ehle duwal **RAZA** pade is balaa mein meri balaa
Maiñ gada hooñ apne kareem ka mera deen para e naañ nahiñ

RUKH DIN HAI YA MEHR E SAMAA

Rukh din hai ya mehr e samaa ye bhi nahiñ wo bhi nahiñ
Shab zulf ya mushk e khuta ye bhi nahiñ wo bhi nahiñ

Mumkin mein ye qudrat kahaañ waajib mein abdiyat kahaañ
Hairaañ hooñ ye bhi hai khataa ye bhi nahiñ wo bhi nahiñ

Haq ye ke haiñ abd e ilaah aur aalam e imkaañ ke shaah
Barzakh haiñ wo sirre khuda ye bhi nahiñ wo bhi nahiñ

Bulbul ne gul un ko kaha qumri ne sarwe jaañ fiza
Hairat ne jhunjhlakar kaha ye bhi nahiñ wo bhi nahiñ

Khursheed tha kis zor par kya badh ke chamka tha qamar
Be parda jab wo rukh huwa ye bhi nahiñ wo bhi nahiñ

Dar tha ke isyaañ ki sazaa ab hogi ya roz e jazaa
Di unki rehmat ne sadaa ye bhi nahiñ wo bhi nahiñ

Koi hai naazaañ zohad par ya husn e tauba hai sipar
Yaañ hai faqat teri ataa ye bhi nahiñ wo bhi nahiñ

Din lahw mein khona tujhe shab subh tak sona tujhe
Sharm e nabi khauf e khuda ye bhi nahiñ wo bhi nahiñ

Rizq e khuda khaaya kiya farmaan e haq taala kiya
Shukr e karam tars e sazaa ye bhi nahiñ wo bhi nahiñ

Hai bulbule rangeeñ **RAZA** ya tooti e nagma saraa
Haq ye ke waasif hai tera ye bhi nahiñ wo bhi nahiñ

WASF E RUKH UNKA KIYA KARTE HAIÑ

Waf e rukh unka kiya karte haiñ sharh washshamsudduha karte haiñ
Unki ham mad-ho sana karte haiñ Jin ko mehmood kaha karte haiñ

Tu hai khursheed e Risaalat pyare chhup gaye teri ziya mein taare
Ambiya aur haiñ sab mah paare tujh se hi noor liya karte haiñ

Apne maula ki hai bas shaan e azeem jaanwar bhi karein jin ki taazeem
Sang karte hain adab se tasleem ped sajde mein gira karte hain

Ungliyaan paayin wo pyari pyari jin se dariya e karam hain jaari
Josh par aati hai jab gam khwari tishne sairaab huwa karte hain

Jab sabaa aati hai taiba se idhar khilkhila padti hain kaliyaan yaksar
Phool jaame se nikal kar baahar rukhe rangeen ki sanaa karte hain

Toot padti hain balaaein jin par jin ko milta nahiin koi yaawar
Har taraf se wo pur armaan phirkar un ke daaman mein chhupa karte hain

Lab par aa jaata hai jab naam e janaab muh mein ghul jaata hai shehd e naayaab
Wajd mein hoke hum aye jaaan betaab apne lab choom liya karte hain

Apne dil ka hai unhiin se aaraam sauñpe hain apne unhiin ko sab kaam
Lau lagi hai ke ab us dar ke gulaam chaara e dard e **RAZA** karte hain

CHAMAN E TAIBA MEIN SUMBUL

Chaman e Taiba mein sumbul jo sañwaare gesu
Hoor badh kar shikan e naaz pe waare gesu

Ki jo baalon se tere rauze ki jaarob kashi
Shab ko shabnam ne tabarruk ko hain dhare gesu

Hum siyaah kaaron pe Ya Rab tapish e mehshar mein
Saaya afgan hon tere pyaare ke pyaare gesu

Sukhe dhaano pe hamare bhi karam ho jaaye
Chhaaye rehmat ki ghata ban ke tumhare gesu

Silsila paake shafa'at ka jhuke padte hain
Sajda e shukr ke karte hain ishaare gesu

Bhini khushbu se mahek jaati hain galiyaan Wallaah
Kaise phoolon mein basaaye hain tumhare gesu

Tel ki boondein tapakti nahiin baalon se **RAZA**
Sub-he aariz pe luta-te hain sitaare gesu

YAAD MEIN JIS KI NAHIN

Yaad mein jis ki nahiin hoshe tan o jaaan hum ko
Phir dikha de wo rukh aye mehr e farozaaan hum ko

Jis tabassum ne gulistaaan pe girayi bijli
Phir dikha de wo ada e gule khanda hum ko

Kaash aaweza e qandeel e madina ho wo dil
Jis ki sozish ne kiya rashk e charagaan hum ko

Sham e Taiba se main parwana rahoon kab tak door
Haaan jala de sharar e aatish e pinhaan hum ko

Khaak hojaayeen dar e paak pe hasrat mit jaaye
Ya Ilahi na phira be sar o saamaan hum ko

Tang aaye hain do aalam teri betaabi se
Chain lene de tap e seena e sozaan hum ko

Mere har zakhm e jigar se ye nikalti hai sada
Aye maleeh e arabi kar de namakdaan hum ko

Aye **RAZA** wasf e rukh e paak sunaane ke liye
Nazr dete hain chaman murg-e-gazal khwaaan hum ko

HAAJIYO! AAO SHAHANSHAAH KA RAUZA DEKHO

Haajiyo! aao Shahanshaah ka rauza dekho
Kaa'ba to dekh chuke kaa'be ka kaa'ba dekho

Rukne shaami se miti wahshat e shaam e gurbat
Ab Madina ko chalo sub-he dilaara dekho

Aab e zam zam to piya khoob bujhaayin pyasein
Aao joode shah e kausar ka bhi dariya dekho

Zer e meezaab miley khoob karam ke chheeñte
Abre rehmat ka yahaan zor barasna dekho

Dhoom dekhi hai dar e ka'aba pe betaabon ki
Un ke mushtaqon mein hasrat ka tadapna dekho

Misl e parwana phira karte the jis sham'a ke gird
Apni us sham'a ko parwana yahaan ka dekho

Khoob aankhon se lagaya hai gilaf e ka'aba
Qasr e mehboob ke parde ka bhi jalwa dekho

Waan muteton ka jigar khauf se pani paaya
Yaan siyaahkaaron ka daaman pe machalna dekho

Mehr e maadar ka mazaa deti hai aagosh e hateem
Jin pe maa baap fida yaan karam un ka dekho

Dho chuka zulmat e dil bosa e sang e aswad
Khaak bos e Madina ka bhi rutba dekho

Jum'a e Makka tha Eid ehle ibadat ke liye
Mujrimo! Aao yahaan Eid e doshamba dekho

Gaur se sun to **RAZA** Ka'aba se aati hai sadaa
Meri aankhon se mere pyaare ka rauza dekho

PUL SE UTAARO RAAH GUZAR KO

Pul se utaaro raah guzar ko khabar na ho
Jibreel par bichaein to par ko khabar na ho

Kaantha mere jigar se gam e rozgaar ka
Yun kheen ch lijiye ke jigar ko khabar na ho

Faryaad ummati jo kare haal e zaar mein
Mumkin nahi ke khair e bashar ko khabar na ho

Kehti thi ye buraq se us ki subuk rawi
Yun jaaiye ke garde safar ko khabar na ho

Farmaate hai ye dono hai sardaar e do jahaan
Aye Murtaza! Ateeq o Umar ko khabar na ho

Aisa gumaa de un ki vila mein khuda hamein
Dhoondha karey par apni khabar ko khabar na ho

Aye khaar e taiba dekh ke daaman na bheeg jaye
Yun dil mein aa ke deeda e tar ko khabar na ho

Aye shoqe dil ye sajda gar un ko rawaa nahi
Achha wo sajda kijiye ke sar ko khabar na ho

Un ke siwa **RAZA** koi haami nahi jahaan
Guzra karey pisar pe pidar ko khabar na ho

YA ILAHI HAR JAGAH

Ya Ilahi har jagaah Teri Ataa ka saath ho
Jab pade mushkil shahe mushkil kusha ka saath ho

Ya Ilahi bhool jaoon naz'a ki takleef ko
Shaadi e deedar e husn e Mustafa ka saath ho

Ya Ilahi gor e teera ki jab aaye sakht raat
Un ke pyaare munh ki subhe jaañfiza ka saath ho

Ya Ilahi jab pade mehshar mein shor e daarogeer
Amn dene wale pyaare peshwa ka saath ho

Ya Ilahi jab zubanein baahar aayein pyaas se
Saahib e Kausar shah e Jood o Ataa ka saath ho

Ya Ilahi sard mohri par ho jab khursheed e hashr
Sayyid e bey saaya ke zill e liwa ka saath ho

Ya Ilahi garmi e mehshar se jab bhadkeiñ badan
Daaman e mehboob ki thandi hawaa ka saath ho

Ya Ilahi naama e Aamaal jab khulne lageiñ
Aib posh e khalq sattaar e khata ka saath ho

Ya Ilahi jab baheñ aañkheñ hisaab e jurm meñ
Un tabassum rez hoñtoñ ki dua ka saath ho

Ya Ilahi jab hisaab e khanda e be ja rulaye
Chashm e giryaan e shafee e Murtaja ka saath ho

Ya Ilahi rang laayeñ jab meri be baakiyaañ
Un ki neechi neechi nazroñ ki hayaa ka saath ho

Ya Ilahi jab chaloon taareek raahe pul siraat
Aftaab e haashmi noorul huda ka saath ho

Ya Ilahi jab sare shamsheer par chalna pade
Rabbe Sallim kehne waale gamzuda ka saath ho

Ya Ilahi jo duaeeñ nek hum tujh se kareñ
Qudsiyoñ ke lab se aameeñ rabbana ka saath ho

Ya Ilahi Jab **RAZA** khwaabe giraañ se sar uthaye
Daulat e bedaar e Ishq e Mustafa ka saath ho

KYA HI ZAUQ AFZA SHAFAT HAI TUMHARI WAH WAH

Kya hi zauq afza shafa'at hai Tumhari wah wah
Qarz leti hai gunaah parhezgaari wah wah

Khaama e qudrat ka husn e dast kaari wah wah
Kya hi tasveer apne pyaare ki sañwaari wah wah

Ungliyaañ haiñ faiz par toote haiñ pyase jhoom kar
Nadiyaañ panj aab e rehmat ki haiñ jaari wah wah

Noor ki khairaat lene daud-te haiñ mehr o maah
Uth-ti hai kis shaan se gard e sawaari wah wah

Nafs ye kya zulm hai jab dekho taaza jurm hai
Naatawaañ ke sar par itna bojh bhaari wah wah

Mujrimoñ ko dhoondti phirti hai rehmat ki nigaah
Taala e bargashta teri saazgaari wah wah

Kya Madina se saba aayi ke phooloon meñ hai aaj
Kuchh nayi boo bhini bhini pyari pyari wah wah

Is taraf rauze ka noor us samt mimbar ki bahaar
Beech meñ jannat ki pyari pyari kyari wah wah

Sadqe is in'aam ke qurbaan is ikraam ke
Ho rahi hai dono aalam meñ tumhari wah wah

Para e dil bhi na nikla dil se tohfe meñ **RAZA**
Un sagaan e ku se itni jaan pyari wah wah

SAB SE AULA WA AALA HAMARA NABI

Sab se Aula wa Aala hamara Nabi
Sab se Baala wa Wala hamara Nabi

Apne maula ka pyara hamara Nabi
Donoñ aalam ka doolha hamara Nabi

Bazm e aakhir ka sham'a farozaañ huwa
Noor-e-awwal ka jalwa hamara Nabi

Jis ko shaayaañ hai arsh e khuda par juloos
Hai wo sultane wala hamara Nabi

Bujh gayiñ jis ke aage sabhi mash'aleiñ
Sham'a wo lekar aaya hamara Nabi

Jis ke talwoñ ka dhowan hai aab e hayaat
Hai wo jaane maseeha hamara Nabi

Khalq se Auliya, Auliya se Rusul
Aur Rasooloñ se Aala hamara Nabi

Husn khaata hai jis ke namak ki qasam
Wo maleeh e dil aara hamara Nabi

Jis ki do boond hai kausar o salsabeel
Hai wo rehmat ka dariya hamara Nabi

Jaise sab ka Khuda ek hai waise hi
Inka unka tumhara hamara Nabi

Qarnoñ badli Rasooloñ ki hoti rahi
Chand badli ka nikla hamara Nabi

Kaun deta hai deneko muñh chahiye
Dene wala hai sachcha hamara nabi

Kya khabar kitne tare khile chhup gaye
Par na doobe na dooba hamara nabi

Mulk-e-kaunain mein Ambiya taajdaar
Taajdaaron ka Aaq a hamara Nabi

La makaañ tak ujaala hai jis ka wo hai
Har makaañ ka ujaala hamara Nabi

Saare achchhoñ mein achchha samjhiye jise
Hai us achchhe se achchha hamara Nabi

Sare Ooñchoñ mein Ooñcha samajhiye jise
Hai us Ooñche se Ooñcha hamara Nabi

Ambiya se karoon arz kyun maaliko!
Kya Nabi hai tumhara hamara Nabi

Jis ne tukde kiye haiñ qamar ke wo hai
Noor e wahdat ka tukda hamara Nabi

Sab chamak wale ujloñ mein chamka kiye
Andhe Sheeshoñ mein chamka hamara Nabi

Jis ne murda diloñ ko di umr e abad
Hai wo jaan e maseeha hamara Nabi

Gamzadoñ ko **RAZA** muzda dike hai
Bekasoñ ka sahara hamara Nabi

DILKO UN SE KHUDA JUDA NA KARE

Dil ko un se khuda juda na kare
Bekasi loot le khuda na kare

Is mein rauza ka sajda ho ke tawaaf
Hosh mein jo na ho wo kya na kare

Sab tabiboñ ne de diya hai jawaab
Aah Isaa! agar dawaa na kare

Dil kahaañ le chala haram se mujhe
Arey tera bura khuda na kare

Hashr mein hum bhi Sair dekheinge
Munkir aaj in se ilteja na kare

Jab teri khu hai sab ka ji rakhna
Wahi achchha jo dil bura na kare

Le **RAZA** sab chale Madine ko
Main na jaoñ arey khuda na kare

MOMIN WO HAI JO UN KI IZZAT PE MAREY DIL SE

Momin wo hai jo un ki izzat pe marey dil se
Taazeem bhi karta hai najdi to marey dil se

Wallaah wo sun lenge fariyaad ko pahuñchege
Itna bhi to ho koi jo aah karey dil se

Bichhdi hai gali kaisi bigdi hai bani kaisi
poochho koi ye sadma armaan bhare dil se

Aye abr e karam faryaad, faryaad jalaa daala
Is sozish e gam ko hai zid mere harey dil se

Dariya hai chaadha tera kitni hi udaayeiñ khaak
Utreiñge kahaan mujrim aye afwa tere dil se

Karta hai tu yaad un ki gaflat ko zara rokey
Lillah **RAZA** dil se haañ dil se arey dil se

ARSH E HAQ HAI

Arsh e haq hai masnad e rif'at Rasoolullah ki
Dekhni hai hashr mein Izzat Rasoolullah ki

Qabr mein lehraenge ta hashr chashme noor ke
Jalwa farma hogi jab Tal'at Rasoolullah ki

La wa rabbil arsh jis ko jo mila un se mila
Bat-ti hai kaunain mein Ne'amat Rasoolullah ki

Wo Jahannam mein gaya jo un se mustagni huwa
Hai Khalilullah ko Haajat Rasoolullah ki

Suraj ulte paoñ palte chaand ishaare se ho chaak
Andhe najdi dekh le Qudrat Rasoolullah ki

Tujh se aur jannat se kya matlab wahaabi door ho
Hum Rasoolullah ke Jannat Rasoolullah ki

Najdi us ne tujh ko mohlat di ke is aalam mein hai
Kaafir o murtad pe bhi Rehmat Rasoolullah ki

Hum bhikaari wo karim un ka khuda un se fazooñ
Aur na kehna nahiñ Aadat Rasoolullah ki

Ahlesunnat ka hai beda paar As'haab e Huzoor
Najm haiñ aur naav hai Itrat Rasoolullah ki

Khaak hokar Ishq mein aaraam se sona mila
Jaan ki akseer hai Ulfat Rasoolullah ki

Toot jayeñge gunah gaaron ke fauran qaid o band
Hashr ko khul jayegi Taaqat Rasoolullah ki

Ya Rab ik saa'at mein dhul jayeñ siyaah kaaron ke jurm
Josh mein aa jaaye ab Rehmat Rasoolullah ki

Aye **RAZA** khud saahib e qur'aañ hai maddahe Huzoor
Tujh se kab mumkin hai phir Midhat Rasoolullah ki

PESH E HAQ MUZDA SHAFAT

Pesh e Haq muzda shafa'at ka sunaate jaayenge
Aap rotey jaayenge hum ko hañsaate jaayenge

Dil nikal jaane ki jaa hai aah kin aañkhoñ se wo
Hum se pyaasoñ ke liye dariya bahaate jaayenge

Kushtagaan e garmi e mehshar ko wo jaan e maseeh
Aaj daaman ki hawaa dekar jilate jaayenge

Haan chalo hasrat zado sunte haiñ woh din aaj hai
Thi khabar jis ki ke wo jalwa dikhaate jaayenge

Aaj Eid e aashiqaañ hai gar khuda chaahe ke wo
abru e pewasta ka aalam dikhaate jaayenge

Kuchh khabar bhi hai faqeer o aaj wo din hai ke wo
Ne'amate khuld apne sadqe mein lutaate jaayenge

Khaak uftaado bas un ke aane hi ki der hai
Khud wo girkar sajda mein tumko uthaate jaayenge

Wus'ateiñ di haiñ khuda ne daaman e mehboob ko
Jurm khulte jaayenge aur wo chhupaate jaayenge

Lo wo aaye muskuraate hum aseeroñ ki taraf
Khirmane isyaañ par ab bijli giraate jaayenge

Aañkh kholo gamzado dekho wo giryaan aaye haiñ
Lohe dil se naqsh e gam ko ab mitaate jaayenge

Aftaab un ka hi chamke ga jab auroñ ke charaag
Sarsare joshe baala se jhilmilaate jaayenge

Paaye kubaañ pul se guzreñge teri aawaaz par
Rabb e Sallim ki sadaa par wajd laate jaayenge

Hashr tak daleiñge hum paida-ishe maula ki dhoom
Misl e faaras najd ke qil'ae giraate jaayenge

Khaak ho jaayeñ 'adu jalkar magar hum to **RAZA**
Dum meiñ jab tak dum hai zikr un ka sunaate jaayenge

CHAMAK TUJH SE PAATE HAIN

Chamak tujh se paate haiñ sab paane wale
Mera dil bhi chamka de chamkaane wale

Barasta nahiñ dekh kar abr-e-rehmat
Badoñ par bhi barsa de barsaane wale

Madine ke khitte khuda tujh ko rakhe
Gariboñ faqiroñ ke thehraane wale

Tu zinda hai wallaah tu zinda hai wallaah
Mere chashm e aalam se chhup jaane wale

Maiñ mujrim hooñ aaqa mujhe saath le lo
Ke raste meiñ haiñ ja bajaa thaane wale

Haram ki zameeñ aur qadam rakh ke chalna
Arey sar ka mauqa hai o jane wale

Tera khaayeñ tere gulaamoñ se uljheñ
Haiñ munkir ajab khaane gurraane wale

Rahega yuñhi un ka charcha rahega
Pade khaak ho jaayeñ jal jaane wale

Ab aayi shafa'at ki saa'at ab aayi
Zara chain le mere ghabraane wale

RAZA nafs dushman hai dum meiñ na aana
Kahaañ tum ne dekhe haiñ chandraane wale

AAÑKHEIÑ RO RO KE SUJAANE WALE

AaÑkheñ ro ro ke sujaane wale

Jaane wale nahiñ aane wale

Sun leiñ a'ada maiñ bigadne ka nahiñ

Wo salaamat haiñ banaane wale

Añkheñ kuchh kehti haiñ tujh se paigaam

O dar e yaar ke jaane wale

Phir na karwat li Madina ki taraf

Arey chal jhoote bahaane wale

Husn tera saa na dekha na suna

Kehte haiñ agle zamaane wale

Wahi dhoom un ki hai Maasha-Allah

Mit gaye aap mitaane wale

Saath le lo mujhe maiñ mujrim hooñ

Raah meiñ padte haiñ thaane wale

Ho gaya dhak se kaleja mera

Haaye rukhsat ki sunaane wale

Kyuñ **RAZA** aaj gali sooni hai

Uth mere dhoom machaane wale

KYA MAHEKTE HAIÑ MAHEKNE WALE

Kya mahekte haiñ mahekne wale
 Boo pe chalte haiñ bhatakne wale
 Jagmaga uthi meri gor ki khaak
 Tere qurbaan chamakne wale
 Mahe bedaag ke sadqe jaaoñ
 Yuñ damakte haiñ damakne wale
 Arsh tak phaili hai taab e aariz
 Kya jhalakte haiñ jhalakne wale
 Gul e taiba ki sana gaate haiñ
 Nakhl e Tooba pe chahekne wale
 Aasiyo! thaam lo daaman un ka
 Wo nahiñ haath jhatakne wale
 Abr e rehmat ke salaami rehna
 Phalte haiñ paude lachakne wale
 Arey ye jalwa gaahe jaanaa hai
 Kuchh adab bhi hai phadakne wale
 Sunniyo! un se madad maañge jaao
 Pade bakte raheiñ bakne wale
 Sham'e yaad e rukh e jaanaa na bujhe
 Khaak ho jaayeñ bhadakne wale
 Maut kehti hai ke jalwa hai qareeb
 Ek zaraa so leiñ bilakne wale
 Koi in tez radoñ se keh do
 Kis ke hokar raheiñ thakne wale
 Dil sulagta hi bhalaa hai aye zabt
 Bujh bhi jaate haiñ dahakne wale
 Hum bhi kumhlaane se gaafil the kabhi
 Kya hañsa gunche chatakne wale
 Nakhl se chhutke ye kya haal huwa
 Aah! o patte khadakne wale

Jab gire muñh sooye maikhaana tha
 Hosh meiñ haiñ ye bahekne wale
 Dekh O zakhm e dil aape ko sambhaal
 Phoot behte haiñ tapakne wale
 Mae kahañ aur kahañ maiñ zaahid
 Yuñ bhi to chhakte haiñ chhakne wale
 Kaf e dariya e karam meiñ haiñ **RAZA**
 Paañch fawwaare chhalakne wale

RAAH PUR KHAAR HAI KYA HONA HAI

Raah pur khaar hai kya hona hai
 Paoñ afgaar hai kya hona hai
 Hum ko bid kar wahi karna jis se
 Dost bezaar hai kya hona hai
 Tan ki ab kaun khabar le hai hai
 Dil ka aazaar hai kya hona hai
 Dil ! ke teemaar hamara karta
 Aap beemaar hai kya hona hai
 Chhup ke logoñ se kiye jis ke gunaah
 Wo khabardaar hai kya hona hai
 Arey o mujrim e be parwaa dekh
 Sar pe talwaar hai kya hona hai
 Haaye re neend musafir teri
 Kooch taiyaar hai kya hona hai
 Door jaana hai raha din thoda
 Raah dushwaar hai kya hona hai
 Ghar bhi jaana hai musafir ke nahiñ
 Mat pe kya maar hai kya hona hai

Paar jaana hai nahiñ milti naav
 Zor par dhaar hai kya hona hai
 Roshni ki hameiñ aadat aur ghar
 Teera wo taar hai kya hona hai
 Beech meiñ aag ka dariya haail
 Qasd us paar hai kya hona hai
 Is kadi dhoop ko kyun kar jheleiñ
 Shola zan naar hai kya hona hai
 Haaye bigdi to kahaañ aakar naav
 Ain mañjdhaar hai kya hona hai
 Kal to deedar ka din aur yahaañ
 Aañkh bekaar hai kya hona hai
 Muñh dikhaane ka nahiñ aur sahar
 Aam darbaar hai kya hona hai
 Un ko rahem aaye to aaye warna
 Wo kadi maar hai kya hona hai
 Waañ nahi baat banaane ki majaal
 Chara iqraar hai kya hona hai
 Saath waaloñ ne yahiñ chhod diya
 Be kasi yaar hai kya hona hai
 Aakhri deed hai aao mil leiñ
 Ranj bekaar hai kya hona hai
 Dil hameiñ tum se lagaana hi na tha
 Ab safar baar hai kya hona hai
 Jaane waloñ pe ye rona kaisa
 Banda naachaar hai kya hona hai
 Baateiñ kuchh aur bhi tum se karte
 Par kahaañ waar hai kya hona hai

Kyun **RAZA** kudhte ho hañste uttho
 Jab wo Gaffaar hai kya hona hai

KIS KE JALWE KI JHALAK

Kis ke jalwe ki jhalak hai ye ujala kya hai
 Har taraf deeda e hairat zadaa takta kya hai
 Maang mann maanti muñh maañgi muraadeiñ le ga
 Na yahaañ "Na" hai na mangta se ye kehna "Kya hai"
 Hum haiñ un ke wo haiñ tere to huwe hum tere
 Is se badh kar teri simt aur waseela kya hai
 Un ki ummat meiñ banaaya unheñ rehmat bheja
 Yuñ na farma ke tera rehm meiñ da'awa kya hai
 Sadqa pyare ki hayaa ka ke na le mujh se hisaab
 Bakhsh be poochhe lajaaye ko lajaana kya hai
 Zaahid un ka maiñ gunahgaar wo mere shaaf'e
 Itni nisbat mujhe kya kam hai tu samjha kya hai
 Kaash fariyaad meri sun ke ye farmaeiñ Huzoor
 Haañ koi dekho ye kya shor hai goga kya hai
 Kaun aafat zadaa hai kis pe balaa tooti hai
 Kis museebat meiñ giraftaar hai sadma kya hai
 Kis se kehta hai ke Lillah khabar lije meri
 Kyuñ hai betaab ye be chaini ka rona kya hai
 Is ki be chaini se hai khatir e aqdas pe malaal
 Be kasi kaisi hai poochho koi guzra kya hai
 Yuñ malaik kareiñ ma'rooz ke ek mujrim hai
 Is se pursish hai bataa toone kiya kya kya hai

Saamna qaher ka hai daftar e aamaal hai pesh
Dar raha hai ke Khuda hukm sunaata kya hai

Aap se karta hai fariyaad ke yaa Shahe Rusul
Banda bekas hai shaha rehm mein waqfa kya hai

Ab koi dum mein giraftaar e balaa hota hoon
Aap aa jaayein to kya khauf hai khatka kya hai

Sun ke ye arz meri behr e karam josh mein aaye
Yun malaalik ko ho irshaad thaherna kya hai

Kis ko tum morid e aafaat kiya chahte ho
Hum bhi to aake zara dekhein tamaasha kya hai

Un ki aawaz pe kar uthoon main besakhta shor
Aur tadap kar ye kahoon ab mujhe parwa kya hai

Lo wo aaya mera haami mera gam khwaare umam
Aa gayi jaañ taney be jaañ mein ye aana kya hai

Phir mujhe daaman-e-aqdas mein chhupa lein sarwar
Aur farmaayein hato is pe taqaaza kya hai

Banda aazaad shuda hai ye hamaare dar ka
Kaisa lete ho hisaab is pe tumhara kya hai

Chhod kar mujh ko farishte kahein mehkoom hain hum
Hukm e waala ki na taameel ho zohra kya hai

Ye samaan dekh ke mehshar mein uthe shor ke waah
Chashm e baddoor ho kya shaan hai rutba kya hai

Sadqe is rehm ke is saaya e daaman pe nisaar
apne bande ko museebat se bachaaya kya hai

Aye **RAZA** Jaan e anaadil tere nagmon ke nisaar
Bulbule baag e Madina tera kehna kya hai

SARWAR KAHOOÑ KE MAALIK O MAULA

Sarwar Kahoon ke maalik o maula kahoon tujhe

Baag e khaleel ka gule zeba kahoon tujhe

Hirmaan naseeb hoon tujhe ummeed gah kahoon

Jaan e muraad kaane tamanna kahoon tujhe

Gulzaar e quds ka gul e rangeen adaa kahoon

darmaan e dard e bulbule shaida kahoon tujhe

Sub-he watan pe shaam e gareebaan ko doon sharaf

bekas nawaaz gesoon wala kahoon tujhe

Allah re tere jism e munawwar ki taabishein

Aye jaane jaañ main jaane tajalla kahoon tujhe

Be daag lala ya qamar e be kalaf kahoon

Be khaar gulban e chaman aara kahoon tujhe

Mujrim hoon apne afw ka saamaan karoon shaha

Yaani shafee' roz e jazaa ka kahoon tujhe

Is murda dil ko muzda hayaat e abad ka doon

Taab o tawaane jaane maseeha kahoon tujhe

Tere to wasf aib e tanaahi se hain baree

Hairaan hoon mere shaah main kya kya kahoon tujhe

Keh legi sab kuch un ke sana khwaan ki khamoshi

Chup ho raha hai keh ke main kya kya kahoon tujhe

Lekin **RAZA** ne khatm sukhan is pe kar diya

Khaaliq ka banda khalq ka Aaqahoon tujhe

ARSH KI AQL DANG HAI

Arsh ki aql dang hai charkh mein aasmaan hai

Jaan e muraad ab kidhar haaye tera makaan hai

Bazm e sana e zulf mein meri uroos e fikr ko

Saari bahaare hasht khuld chhota sa itr daan hai

Arsh pe jaake murg e aql thak ke gira gash aagaya
Aur abhi manzilon par-e pehla hi aastaan hai

Arsh pe taaza chhed chhaad farsh pe turfa dhoom dhaam
Kaan jidhar lagaaiye teri hi daastaan hai

Ek tere rukh ki raushni chain hai do jahaan ki
Ins ka uns usi se hai jaan ki wo hi jaan hai

Wo jo na the to kuchh na tha wo jo na hon to kuchh na ho
Jaan haiñ wo jahaan ki jaan hai to jahaan hai

Goad mein aalame shabaab haale shabaab kuchh na poochh
Gulbane baag e noor ki aur hi kuchh Uthaan hai

Tujh sa siyaah kaar kaun un sa Shafee' hai kahaan
Phir wo tujhi ko bhool jaayein dil ye tera gumaan hai

Pesh e nazar wo nav bahaar sajde ko dil hai be qaraar
Rokiye sar ko rokiye haañ yahi imtehaan hai

Shaan e khuda na saath de un ke khiraam ka wo baaz
Sidrah se ta zameen jise narm si ek udaan hai

Baare jalaal Utha liya gar che kaleja shaq huwa
Yun to ye maahe sabz rang nazron mein dhaan paan hai

Khauf na rakh **RAZA** zara tu to hai Abd e Mustafa
Tere liye amaan hai tere liye amaan hai

UTHA DO PARDA DIKHA DO CHEHRA

Utha do parda dikha do Chehra ke Noor e baari Hijaab mein hai
Zamana Taareek ho raha hai ke Mehr kab se Naqaab mein hai

Jali Jali bu se us ki paida hai sozishe ishq e chashm e wala
Kabaabe Aahu mein bhi na paya mazaa jo dil ke kabaab mein hai

Unhiñ ki boo maaya e saman hai unhiñ ka jalwa chaman chaman hai
Unhiñ se gulshan mahek rahe haiñ unhiñ ki rangat gulaab mein hai

Wo gul haiñ labhaaye nazuk un ke hazaaron jhadte haiñ phool jin se
Gulaab gulshan mein dekhe bulbul ye dekh gulshan gulaab mein hai

Khade haiñ Munkar Nakeer sar par na koi haami na koi yaawar
Bataado aakar mere payamber ke sakht mushkil jawaab mein hai

Khudaye qahhaar hai gazab par khule haiñ badkaariyon ke daftar
Bachalo aakar shafee e Mehshar tumhara banda azaab mein hai

Kareem aisa mila ke jis ke khule haiñ haath aur bhare khazaane
Batao aye mufliso! ke phir kyun tumhara dil izzat mein hai

Kareem apne karam ka sadqa la'een be qadr ko na sharma
Tu aur **RAZA** se hisaab lena Raza bhi koi hisaab mein hai

SOONA JUNGLE RAAT ANDHERI

Soona Jungle Raat Andheri Chhaai Badli Kaali hai
Sone walo jaagte rahiyo choroñ ki rakhwaali hai

Aankh se kaajal Saaf chura lein yaañ wo chor balaa ke haiñ
Teri gathri taaki hai aur tooney neend nikaali hai

Ye jo tujhko bulaata hai ye thag hai maar hi rakhe ga
Haaye Musafir dum mein na aana mat kaisi matwaali hai

Sona paas hai Soona ban hai Sona Zaher hai uth pyare
Tu Kehta hai neend hai meethi teri mat hi niraali hai

Aankhein malna jhunjhla padna laakhoñ jamaai angdaai
Naam par uthne ke ladta hai uthna bhi kuchh gaali hai

Jugnu chamke patta khadke mujh tanha ka dil dhadke
Dar samjhaaye koi pawan hai ya agyaa betaali hai

Baadal garje bijle tadpe dhak se kaleja ho jaaye
Ban mein ghataa ki bhayaanak Soorat kaisi kaali kaali hai

Paoñ utha aur thokar khaayi kuchh sambhla phir auñdhe muñh
Meñh ne phislan kar di hai aur dhur tak khaai naali hai

Saathi Saathi keh ke pukaaruñ saathi ho to jawaab aaye
Phir jhunjhla ke sar de patkuñ chal re maula waali hai

Tum to chaand Arab ke ho pyaare tum to Ajam ke sooraj ho
Dekho mujh bekas pe shab ne kaisi aafat daali hai

Duniya ko tu kya jaane ye bis ki gaañth hai harraafa
Soorat dekho zaalim ki to kaisi bholi bhaali hai

Shahed dikhaaye zaher pilaaye qaatil dain shohar kush
Is murdaar pe kya lalchaaya duniya dekhi bhaali hai

Wo to nihaayat sasta sauda bech rahe haiñ jannat ka
Hum muflis kya mol chukaayeñ apna haath hi khaali hai

Maula tere afwo karam ho mere gawaah Safaai ke
Warna **RAZA** se chor pe teri digri to iqbaali hai

NABI SARWARE HAR RASOOL O WALI

Nabi Sarware har Rasool o wali hai
Nabi Raaz daare ma'allahi lee hai

Wo Naami ke Naam e Khuda Naam Tera
Raoof o Raheem o Aleem o Ali hai

Hai betaab jis ke liye arsh e aazam

Wo is rehrawe La Makaañ ki gali hai

Nakeerain karte haiñ taazeem meri

Fida ho ke tujh par ye izzat mili hai

Talaatum hai kashti pe toofaan gam ka

Ye kaisi hawa e mukhalif chali hai

Na kyuñkar kahuñ yaa Habibi Agisni

Isi naam se har museebat tali hai

Tere chaaroñ hamdam haiñ yak jaan yak dil

Aboobakr Farooq Usmaan Ali hai

Khuda ne kiya tujhko aagaah sab se

Do aalam mein jo kuchh khafi wo jali hai

Tamanna hai farmaiye roz e mehshar

Ye teri rihaai ki chitthi mili hai

Tere dar ka darbaañ hai Jibreel e Aazam

Tera madh khwaañ har Nabi wo wali hai

Shafa'at kare hashr mein jo **RAZA** ki

Siwa tere kis ko ye Qudrat mili hai

SUNTE HAIÑ KE MEHSHAR MEIÑ

Sunte haiñ ke Mehshar mein sirf Un ki Rasaai hai

Gar un ki rasaai hai lo jab to ban aai hai

Machla hai ke rehmat ne ummid bandhaai hai

Kya baat teri mujrim kya baat banaai hai

Sab ne safey mehshar mein lalkaar diya humko

Aye bekasoñ ke Aaqa ab teri duhaai hai

Yuñ to sab unhiñ ka hai par dil ki agar puchho

Ye toote huwe dil hi khaas un ki kamaai hai

Baazaar e amal mein to sauda na bana apna

Sarkaar karam tujh mein aibi ki samaai hai

Girte huwoñ ko muzda Sajde mein girey Maula

Ro ro ke shafa'at ki tamheed uthaai hai

Aye dil ye sulagna kya jalna hai to jal bhi uth

Dum ghutne laga zaalim kya dhooni ramaai hai

Mujrim ko na sharmao ehbaab kafan dhak do

Muñh dekh ke kya hoga parde mein bhalaai hai

Ab aap hi sambhaalein to kaam apne sambhal jaayein
Hum ne to kamaai sab kheloñ mein gañwaai hai

Aye Ishq tere sadqe jalne se chhute saste
Jo Aag bujha degi wo Aag lagaayi hai

Taiba na sahi afzal Makka hi bada zaahid
Hum Ishq ke bande haiñ kyuñ baat badhaai hai

Matla mein ye shak kya tha wallaah **RAZA** wallaah
Sirf un ki rasaai hai sirf un ki rasaai hai

HIRZE JAAÑ ZIKRE SHAFAT

Hirz e jaan Zikr e Shafa'at kijiye
Naar se bachne ki soorat kijiye
Un ke Naqshe paa pe gairat kijiye
Aankh se chhup kar ziyaarat kijiye
Un ke dar par jaise ho mit jaaiye
Naa Tawaano! kuchh to himmat kijiye
Pher dije panja e deve la'eeñ
Mustafa ke bal pe taaqat kijiye
Un ke dar par baithiye ban kar faqeer
Be nawaao Fikr e sarwat kijiye
Jis ka Husn Allah ko bhi bha gaya
Aise pyaare se Mohabbat kijiye
Naara kijiye Ya Rasoolallah ka
Mufliso! Saamaan e Daulat kijiye
Aap Sulatan e Jahaan hum be nawa
Yaad humko waqt e ne'amat kijiye
Ab to Aaq muñh dikhaane ka nahiñ
Kis tarah rafa e nadamaat kijiye
Apne hathoñ Khud luta baithe haiñ ghar
Kis pe daawa e baza'at kijiye

Kis se kahiye kya kiya kya ho gaya
Khud hi apne par malaamat kijiye

Apni ek meethi nazar ke shahed se
Chaara e zehre museebat kijiye
De khuda himmat ke ye jaan e hazaar
Aap par waarein wo soorat kijiye

Aap hum se badhke hum par maherbaan
Hum karein jurm aap rehmat kijiye
Jo na bhoola hum gariboñ ko **RAZA**
Yaad us ki apni aadat kijiye

DUSHMAN E AHMED PE SHIDDAT KIJIE

Dushman e Ahmed pe shiddat kijiye
Mulhidoñ ki kya murawwat kijiye
Zikr un ka chhediye har baat mein
Chhedna Shaitaan ka aadat kijiye
Misl e faaras zalzale hoñ najd mein
Zikr e Aayaat e Vilaadat kijiye
Gaiz mein jal jaayein be deenoñ ke dil
"Ya Rasoolallah" ki kasrat kijiye
Haq tumhein farma chuka apna habeeb
Ab shafa'at bil muhabbat kijiye
Mulhidoñ ka shak nikal jaaye huzoor
Jaanibe meh phir ishaarat kijiye
Shirk Thehre jis mein taazeem e Habeeb
Us bure mazhab pe laanat kijiye
Zaalimo! Mehboob ka haq tha yahi
Ishq ke badle adaawat kijiye
Baith-te uth-te Huzoor e Paak se
Ilteja wo iste'aanat kijiye

Ya Rasoolallah duhaai Aap ki
 Go shumaale Ahle bid'at kijiye
 Gaus e Aazam Aap se fariyad hai
 Zinda phir ye Paak Millat kijiye
 Ya Khuda Tujh tak hai sab ka muntaha
 Auliya ko hukm e nusrat kijiye
 Mere Aaqā Hazrat e Achhe Miyaañ
 Ho **RAZA** Achha wo Soorat kijiye

SHUKRE KHUDA KE AAJ GHADI

Shukr e Khuda ke aaj ghadi us safar ki hai
 Jis par nisaar jaan falaah o zafar ki hai
 Garmi hai tap hai dard hai kulfat safar ki hai
 Na Shukr ye to dekh azeemat kidhar ki hai
 Hum ko to apne saaye mein aaraam hi se laaye
 Heeley bahaane waalon ko ye raah dar ki hai
 Lut-te haiñ maare jaate haiñ yuñ hi suna kiye
 Har baar di wo amn ke gairat hazar ki hai
 Maahe Madina apni tajalli ataa kare
 Ye dhalti chaañdni to pahar dopahar ki hai
 Us ke tufail haj bhi khuda ne kara diye
 Asl e muraad haazri us paak dar ki hai
 Ka'aba ka naam tak na liya taiba hi kaha
 Poochha tha hum se jis ne ke nuhzat kidhar ki hai
 Ka'aba bhi hai unhiñ ki tajalli ka ek zill
 Roshan unhiñ ke aks se putli hajar ki hai
 Hote kahañ khaleel o bina ka'aba wo mina
 Lauilaak wale Saahibi sab tere ghar ki hai
 Maula Ali ne waari teri neeñd par namaaz
 Aur wo bhi asr sab se jo a'ala khatar ki hai

Siddique balke gaar mein Jaañ us pe de chuke
 Aur hifz e jaañ to jaan furoz e Gurar ki hai
 Haañ tune un ko jaan unheñ pher di namaaz
 par wo to kar chuke the jo karni bashar ki hai
 Saabit huwa ke jumla faraiz furoo'a haiñ
 Aslul usool bandagi us taajwar ki hai
 Mujrim bulaye aaye haiñ Jaooka hai gawaah
 Phir rad ho kab ye shaan karimoñ ke dar ki hai
 Bad haiñ magar unhiñ ke haiñ baagi nahiñ haiñ hum
 Najdi na aaye us ko ye manzil khatar ki hai
 Tuf najdiyat na kufr na Islaam sab pe harf
 Kaafir idhar ki hai na udhar ki adhar ki hai
 Haakim hakeem daad o dawa deiñ ye kuchh na deiñ
 Mardood ye muraad kis aayat khabar ki hai
 Noor e Ilaah kya hai Mohabbat Habeeb ki
 Jis dil mein ye na ho wo jaga Khook o khar ki hai
 Zikr e Khuda jo un se juda chaaho najdiyo!
 Wallaah zikr e haq nahiñ kunji saqar ki hai
 Be un ke wasta ke khuda kuchh ataa kare
 Haashaa galat galat ye hawas be basar ki hai
 Jinn o Bashar salaam ko haazir haiñ Assalaam
 Ye baargaahe maalike jinn o bashar ki hai
 Shams o Qamar Salaam ko haazir haiñ Assalaam
 Khubi unhiñ ki jot se shams o qamar ki hai
 Khasta Jigar Salaam ko haazir haiñ Assalaam
 Marham yahiñ ki khaak to khasta jigar ki hai
 Ehle Nazar salaam ko haazir haiñ Assalaam
 Ye gard hi to surma sab ehle nazar ki hai
 Ye pyari pyari kyari tere khaana baag ki
 Sard is ki aab o taab se aatish saqar ki hai

Jannat mein aake naar mein jaata nahin koi
 Shukr e khuda nawed najaat o zafar ki hai
 Maañ donoñ bhai bete bhatije azeez dost
 Sab tujhko soñpe milk hi sab tere ghar ki hai
 Jin jin muraadoñ ke liye ehbaab ne kaha
 Pesh khabeer kya mujhe haajat khabar ki hai
 Be maañge dene wale ki ne'amat mein garq haiñ
 Maañge se jo miley kise fehmi is qadar ki hai
 Ya Rab **RAZA** na Ahmed e pareena hoke jaye
 Ye baargaah tere habeeb e abar ki hai
 Aa kuchh suna de ishq ke boloñ mein aye **RAZA**
 Mushtaque tab'a lazzat e soz e jigar ki hai

BHEENI SUHAANI SUBH MEIN

Bheeni suhaani subh mein thandak jigar ki hai
 Kaliyaañ khileeñ diloñ ki hawaa ye kidhar ki hai
 Daaleiñ hari hari haiñ to baaleiñ bhari bhari
 Kusht e amal pari hai ye baarish kidhar ki hai
 Hum jaayeñ aur qadam se lipat kar haram kahe
 Soñpa khuda ko ye Azmat kis safar ki hai
 Hum gird e ka'aba phirte the kal tak aur aaj woh
 Hum par nisaar hai ye Iraadat kidhar ki hai
 Kaalik jabeen ki sajda e dar se chhudaoge
 Mujh ko bhi le chalo ye tamanna hajar ki hai
 Dooba huwa hai shauq mein zamzam aur aañkh se
 Jhaale baras rahe haiñ ye hasrat kidhar ki hai
 Barsa ke jaane waloñ pe gohar karoon nisaar
 Abr e Karam se arz ye meezaab e zar ki hai

Aagosh e shauq khole haiñ jin ke liye hateem
 Wo phir ke dekhte nahin ye dhun kidhar ki hai
 Haañ haañ rahe Madina hai gaafil zaraa tu jaag
 O paoñ rakhne wale ye jaa chashm o sar ki hai
 Waarun qadam qadam pe ke har dam hai jaan-e-nav
 Ye raahe jaañ fiza mere maula ke dar ki hai
 Ghadiyaañ gini haiñ barsoñ ki ye subghadi phiri
 Mar mar ke phir ye sil mere seeney se sar ki hai
 Allahu Akbar apne qadam aur ye khaake paak
 Hasrat malaika ko jahaañ waza' e sar ki hai
 Me'araj ka samaa hai kahaañ pahuñche zaairo
 Kursi se oonchi kursi usi paak ghar ki hai
 Ushhaaq e rouza sajda mein soo e haram jhuke
 Allah jaanta hai ke niyyat kidhar ki hai
 Ye ghar ye dar hai us ka jo ghar dar se paak hai
 Muzda ho be gharo ke sila achhe ghar ki hai
 Mehboob e Rabbe arsh hai is sabz qubba mein
 Pehlu mein jalwa gaah Ateeq o Umar ki hai
 Sa'adain ka qiraan hai pehlu e maah mein
 Jhurmut kiye haiñ taare tajalli qamar ki hai
 Sattar Hazaar Subh haiñ sattar hazaar shaam
 Yun bandagi e zulf o rukh aathoñ paher ki hai
 Jo ek baar aaye dobara na aayeñge
 Rukhsat hi baargaah se bas is qadar ki hai
 Tadpa kareñ badal ke phir aana kahaañ naseeb
 Be hukm kab majaal parinde ko par ki hai

Ye badliyañ na hoñ to karodoñ ki aas jaaye
Aur baargaah marhamate aam tar ki hai

Masoomoñ ko hai umr mein sirf ek baar baar
Aasi pade rehein to sila umr bhar ki hai

Zinda rahein to haazri e baargaah naseeb
Mar jaayein to hayaat e abad aish ghar ki hai

Itna ajab bulandi e jannat pe kis liye
Dekha nahiñ ke bheek ye kis unche ghar ki hai

Arsh e bareen pe kyun na ho firdaus ka dimaag
Utri huwi shabeeh tere baam o dar ki hai

Wo Khuld jis me utregi Abraar ki baraat
Adna nichhaawar us mere doolha ke sar ki hai

Amber zameen abeer hawa mushk e tar gubaar
Adna si ye shanaakht teri rahguzar ki hai

Sarkaar hum gañwaaron me tarz e adab kahaan
Hum ko to bas tameez yahi bheek bhar ki hai

Maañge ge maañge jayeñge muñh maañgi paayeñge
Sarkaar mein na la hai na haajat agar ki hai

Uf be hayaaiyaan ke ye muñh aur tere Huzoor
Haañ tu kareem hai teri khu dar guzar ki hai

Tujh se chhupaoon muñh to karoon kis ke saamne
Kya aur bhi kisi se tawaqqo Nazar ki hai

Jaon kahaan pukaaroon kisey kis ka muñh takoon
Kya purshish aur jaa bhi sag e be hunar ki hai

Lab waa haiñ aankhein band haiñ phaili haiñ jholiyañ
Kitne mazey ki bheek tere paak dar ki hai

Jannat na dein na dein teri rooyat ho khair se
Is gul ke aage kis ko hawas barg o bar ki hai

Sharbat na dein, na dein, to kare baat lutf se
Ye Shahed hai to phir kise parwa shakar ki hai

Maiñ khaana zaad kohna hoon soorat likhi huwi
Bandon kaneezon mein mere maadar pidar ki hai

Mangtaa ka haath uth-te hi daata ki dain thi
Doori qubool o arz mein bas haath bhar ki hai

Sanki wo dekh baad e shafa'at ke de hawa
Ye aabru **RAZA** tere daamaan e tar ki hai

WOH SARWARE KISHWAR E RISAALAT

Wo sarware kishware Risaalat jo arsh par jalwagar huwe the
Naye nirale tarab ke saamaan Arab ke mehmaan ke liye the

Bahaar hai shaadiyaan mubarak chaman ko aabaadiyaan mubarak
Malak falak apni apni lai mein ye ghur Anaadil ka boltey the

Wahaan falak par yahaan zameen mein rachi thi shaadi machi thi dhoomein
Udhar se anwaar hañste aate idhar se nafhaat uth rahe the

Ye Chhoot padti thi un ke rukh ki ke arsh tak chaañdni thi chatki
Wo raat kya jagmaga rahi thi jagah jagah nasb aaine the

Nayi dulhan ki phaban mein ka'aba nikhar ke sañvra sañvar ke nikhra
Hajar ke sadqe kamar ke ek til mein rañg laakhoñ banaav ke the

Ye Jhooma meenzaabe zar ka jhoomar ke aa raha kaan par dhalak kar
Phuhaar barsi to moti jhadkar hateem ki goad mein bhare the

Gubaar ban kar nisaar jaayein kahaan ab us rahguzar ko paayein
Hamaare dil hooriyoñ ki aankhein farishton ke par jahaan bichhe the

Khuda hi de sabr jaan e pur gam dikhaon kyunkar tujhe wo aalam
Jab un ko jhurmut mein le ke qudsi jinaan ka doolha banaa rahe the

Utaar kar un ke rukh ka sadqa ye noor ka bat raha tha baada
Ke chañd sooraj machal machal kar jabeen ki khairaat maañgte the

Wahi to ab tak chhalak raha hai wahi to joban tapak raha hai
Nahaane mein jo gira tha paani katorey taroñ ne bhar liye the

Bacha jo talwon ka un ke dhowan banaa wo jannat ka rang o rogan
Jinhoñ ne doolha ki paai utran wo phool gulzaare noor ke the

Tajalli-e-haq ka sehra sar par salaah o tasleem ki nichhawar
Do ruye qudsi pare jamaakar khade salami ke waaste the

Jo hum bhi waañ hote khaak e gulshan lipat ke qadmoñ se lete utran
Magar karein kya naseeb mein to ye naa muradi ke din likhe the

Hujoom e Ummeed hai ghataao muraadein dekar inhein hataao
Adab ki baagein liye badhaao malaika mein ye galgale the

Uthi jo garde rahe munawwar wo noor barsa ke raaste bhar
Ghire the badal bhare the jal thal umand ke jungle ubal rahe the

Buraaq ke naqsh sum ke sadqe wo gul khilaaye ke saare raste
Mahekte gulban lahekte gulshan hare bhare lehlaha rahe the

Namaaz e Aqsa mein tha yahi sir ayaan ho maa'ni e awwal aakhir
Ke dast bastaa haiñ peechhe haazir jo sultanat aagey kar gaye the

Ye unki aamad ka dabdaba tha nikhaar har shaye ka ho raha tha
Nujoom o aflaak jaam o meena ujaalte the khañgaalte the

Naqaab ulte wo mehr e anwar jalaal e rukhsaar garmiyoñ par
Falak ko haibat se tap chadhi thi tapakte anjum ke aabley the

Badha ye lehra ke behr e wehdat ke dhul gaya naam reg e kasrat
Falak ke teeloñ ki kya haqeeqat ye arsh o kursi do bulbule the

Chala wo sar wa chimañ kharamañ na ruk saka sidrah se bhi daamaañ
Palak jhapakti rahi wo kab ke sab ein o aañ se guzar chuke the

Jhalak si ek qudsiyoñ par aayi hawa bhi daaman ki phir na payi
Sawaari doolha ki door pahuñchi baraat mein hosh hi gaye the

Thake the roohul ameen ke baazu chhuta wo daaman kahaan wo pehlu
Rikaab chhooti ummid tooti Nigaah e hasrat ke walwale the

Rawish ki garmi ko jis ne socha dimaag se ik bhabooka phoota
Khirad ke jungle mein phool chamka dahar dahar ped jal rahe the

Jilo mein jo murge aql ude the ajab bure haaloñ girte padte
Wo sidrah hi par rahe the thak kar chadha tha dum tewar aa gaye the

Jhuka tha mujre ko arsh e aala gire the sajde mein bazm e baala
Ye Aankhein qadmoñ se mal raha tha wo gird qurbaan ho rahe the

Ziyaeñ kuchh arsh par ye aayiñ ke saari qandeelaiñ jhilmilayein
Huzoor e khursheed kya chamakte charaag muñh apna dekhthe the

Yahi samaan tha ke paik e rehmat khabar ye laaya ke chaliye Hazrat
Tumhari khaatir kushaada haiñ jo Kaleem par band raaste the

Badh aye Mohammed Qareeñ ho Ahmed Qareeb aa Sarwar e Mumajjad
Nisaar jaoñ ye kya nida thi ye kya samaan tha ye kya maz'e the

Tabarakallaah shaan Teri tujhi ko zeba hai be niyaazi
Kahiñ to wo josh e Lan Taraani kaheen taqaaze wisaal ke the

Khirad se keh do ke sar jhukale gumaañ se guzre guzarne wale
Pade haiñ yaañ khud jehat ko laaley kise bataaye kidhar gaye the

Suraage ein o mataa kahaan tha nishaan e kaif o ila kahaan tha
Na koñ raahi na koi saathi na sang e manzil na marhale the

Udhar se paiham taqaaze aana Idhar tha mushkil qadam badhana
Jalal o haibat ka saamna tha jamaal o rehmat ubhaarte the

Badhe to lekin jhijhakte darte haya se jhukte adab se rukte
Jo qurb unheen ki rawish pe rakhte to laakhoñ manzil ke faasle the

Par un ka badhna to naam ko tha haqiqatan fe'l tha udhar ka
Tanazzuloñ mein taraqqi afza Dana Tadalla ke silsile the

Huwa na aakhir ke ek bajraa tamooj e behr e hu mein ubhra
Danaa ki goadi mein un ko lekar fanaa ke langar utha diye the

Kise miley ghaat ka kinara kidhar se guzra kahaan utara
Bhara jo misl e nazar tarara wo apni aankhoñ se khud chhupe the

Uthe jo qasr e danaa ke parde koi khabar de to kya khabar de
Wahaan to jaa hi nahiñ dui ki na keh ke wo bhi na the arey the

Wo baag kuchh aisa rang laaya ke guncha wo gul ka farq uthaaya
Girah mein kaliyoñ ki baag phoolle guloñ ke tukme lage huwe the

Muheet o markaz mein farq mushkil rahe na faasil khutoot waasil
kamaanein hairat mein sar jhukaaye ajeeb chakkar mein daairey the

Hijaab uthne mein laakhoñ parde har ek parde mein laakhoñ jalwe
Ajab ghadi thi ke wasl o furqat janam ke bichhde galey mile the

Zabaanein sookhi dikhakhe maujein tadap rahi thein ke paani paayein
Bhañvar ko ye zauf tishnagi tha ke halqe aankhoñ mein pad gaye the

Wahi hai Awwal wahi hai Aakhir wahi hai Baatin wahi hai Zaahir
Usi ke jalwe usi se milne usi se us ki taraf gaye the

Kamaan e imkaan ke jhoote nuqto tum Awwal Aakhir ke pher mein ho
Muheet ki chaal se to poochho kidhar se aaye kidhar gaye the

Udhar se thein nazr sheh namaazein Idhar se in'aame khusrawi mein
Salaam o rehmat ke haar gundh kar guluye pur noor mein pade the

Zubaan ko intezaar e guftan to gosh ko hasrat e shuneedan
Yahaan jo kehna tha keh liya tha jo baat sunni thi sun chuke the

Wo burj e bat-ha ka maah paara bahisht ki sair ko sidhaara
Chamak pe tha khuld ka sitara ke is qamar ke qadam gaye the

Tarab ki naazish ke haañ lachakiye adab wo bandish ke hil na sakiye
Ye Josh e Ziddain tha ke paude kusha kashe Arrah ke taley the

Khuda ki qudrat ke chaañd haq ke karoroñ manzil mein jalwa kar ke
Abhi na taaroñ ki chhauñ badli ke noor ke tadke aa liye the

Nabi e rehmat shafi e ummat **RAZA** pe lillaah ho inaayat
Ise bhi un khil'atoñ se hissa jo khaas rehmat ke waañ bate the

Sana e Sarkaar hai Wazeefa Qubool e Sarkaar hai Tamanna
Na shaayeri ki hawas na parwa rawi thi kya kaise qaafiye the

SUBHA TAIBA MEIN HUI

Subha Taiba mein hui bat-ta hai baada Noor ka
Sadqa lene Noor ka aaya hai taara Noor ka

Baaghe Taiba mein suhana phool phoola Noor ka
Mast boo haiñ bulbulein padhti haiñ kalma Noor ka

Baarihviñ ke chaand ka mujra hai sajda Noor ka
Baaraa burjoñ se jhuka ek ek sitaara Noor ka

Un ke qasr e qadr se khuld ek kamra Noor ka
Sidrah paayein baag mein nanha sa pauda Noor ka

Aayi bid'at chhaai Zulmat rang badla Noor ka
Maahe sunnat mehr e tal'at lele badla Noor ka

Tere hi maathe raha aye jaan sehra Noor ka
Bakht jaaga noor ka chamka sitara Noor ka

Maiñ gadaa tu Baadshaah bhar de pyala Noor ka
Noor din duna tera de daal sadqa Noor ka

Pusht par dhalka sare anwar se shimla Noor ka
Dekhein Moosa toor se utra saheefa Noor ka

Taaj waale dekh kar tera amaama Noor ka
Sar jhukate haiñ Ilahi bol baala Noor ka

Bini e purnoor par rakhshaañ hai bukka Noor ka
Hai liwaa ul hamd par udta pharera Noor ka

Mus-haf e aariz pe hai khatte shafeeaa Noor ka
Lo, siyaahkaaro! mubarak ho qabaala Noor ka

Aab e zar banta hai aariz par paseena Noor ka
Mus-haf e ejaz par chadhta hai sona Noor ka

Pech karta hai fida hone ko lam'aa Noor ka
Girde sar phirne ko banta hai Amaama Noor ka

Haibat e aariz se tharraata hai shola Noor ka
Kafsh e Pa par gir ke ban jaata hai guppha Noor ka

Sham'a dil, mishkaat tan, seena zujaajah Noor ka
Teri soorat ke liye aaya hai Soora Noor ka

Tu hai saaya noor ka har azwu tukda Noor ka
Saaye ka saaya na hota hai na saaya Noor ka

Bazm e wehdat mein mazaa hoga do baala Noor ka
Milne sham'a e toor se jaata hai Ikka Noor ka

Wasf e rukh mein gaati hai Hoorein taraana Noor ka
Qudrati beon mein kya bajta hai lehra Noor ka

Ye kitaabe kun mein aaya turfa aayah noor ka
Gaire qaail kuchh na samjha koi ma'ana Noor ka

Dekhne waalon ne kuchh dekha na bhaala noor ka
Mann ra'aa kaisa? ye aaina dikhaaya Noor ka

Subh kar di kufr ki sachha tha muzda Noor ka
Shaam hi se tha shab e teera ko dhadka Noor ka

Padti hai noori bharan umda hai dariya Noor ka
Sar jhuka aye kishit e kufr aata hai ahla Noor ka

Naariyon ka daur tha Dil jal raha tha Noor ka
Tum ko dekha ho gaya thanda Kaleja Noor ka

Naskh e adiyaa kar ke Khud qabza bithaya Noor ka
Taajwar ne kar liya kachcha Ilaaqa Noor ka

Jo gadaa dekho liye jaata hai toda Noor ka
Noor ki Sarkaar hai kya is mein toda Noor ka

Bheek le Sarkaar se la jald kaasa Noor ka
Maahe nav Taiba mein bat-ta hai maheena Noor ka

Teri nasle paak mein hai bachcha bachcha Noor ka
Tu hai ain e Noor tera sab gharaana Noor ka

Noor ki Sarkaar se paaya doshaala Noor ka
Ho mubarak tum ko Zun Noorain joda Noor ka

Qabr e Anwar kahiye ya Qasr e Mu'alla Noor ka
Charkh e Atlas ya koi Saada sa qubba Noor ka

Aankh mil sakti nahi dar par hai pehra Noor ka
Taab hai be Hukm par maare parinda Noor ka

Naz'a mein lotega Khaak e dar pe shaida Noor ka
Mar ke odhe gi Aroos e jaañ dopatta Noor ka

Taabe mehre hashr se chauñke na kushta Noor ka
Boondiyaañ rehmat ki dene aayeñ chheñta Noor ka

Ye Jo mehr o mah pe hai Itlaaq aata Noor ka
Bheek tere naam ki hai Iste'aara Noor ka

Taab e sum se chauñdhiya kar chaand unheñ qadmoñ phira
Hañs ke bijli ne kaha dekha chhalaawa Noor ka

Chaand jhuk jaata jidhar ungli uthaate mahed mein
Kya hi chalta tha ishaaron par khilona Noor ka

Ek seena tak mushabah ek wahaañ se paoñ tak
Husn e sibtain un ke jaamoñ mein hai neema Noor ka

Saaf shakl e paak hai donoñ ke milne se ayaañ
Khat-e-Tu-am mein likha hai ye do warqa Noor ka

Kaaf gesu Haa dahan Yaa abru aankheñ Ain Suaad
Kaaf Haa Yaa Ain Suaad un ka hai chehra Noor

Aye **RAZA** ye Ahmed-e-Noori ka faiz e Noor hai
Ho gayi meri gazal badh kar qaseeda Noor ka

TERA ZARRA MAH E KAAMIL HAI

Tera zarra mah e kaamil hai Ya Gaus
 Tera qatra yam e saail hai Ya Gaus
 Koi Saalik hai ya Waasil hai Ya Gaus
 Wo kuch bhi ho tera Saail hai Ya Gaus
 Qad e be saaya zille kibriya hai
 Tu us besaaya zil ka zil hai Ya Gaus
 Ye teri champai rangat Husaini
 Hasan ke chaand Sub-he dil hai Ya Gaus
 Ishaara mein kiya jis ne Qamar chak
 Tu is mah ka mahe kaamil hai Ya Gaus
 Tu apne waqt ka Siddeeq e Akbar
 Gani o Haidar o Aadil hai Ya Gaus
 Wali kya mursal aayein khud Huzoor Ayein
 Wo teri Wa'az ki mehfil hai Ya Gaus
 Jisey maange na paayein jaah wale
 Wo bin maange tujhe haasil hai Ya Gaus
 Fuyooz e aalam e ummi se tujh par
 Ayaañ maazi o mustaqbil hai Ya Gaus
 Jo qarnoñ sair mein Aarif na paayein
 Wo teri pehli hi manzil hai Ya Gaus
 Na kyun ho teri manzil arsh e saani
 Ke arsh e haq teri manzil hai Ya Gaus
 Wahin se uble haiñ saatoñ samandar
 Jo teri naher ka Saahil hai Ya Gaus
 Jo tera naam le Zaakir hai pyare
 Tasawwur jo kare Shaagil hai Ya Gaus
 Jo sar dekar tera sauda khareede
 Khuda de aql wo aaqil hai ya Gaus
 Kaha tune ke jo maango milega
RAZA tujh se tera saail hai Ya Gaus

JO TERA TIFL HAI KAAMIL HAI

Jo tera tiftl hai kaamil hai Ya Gaus
 Tufaili ka laqab waasil hai Ya Gaus
 Tu noore awwal o aakhir hai Maula
 Tu khair-e-'aajil o aajil hai Ya Gaus
 Ahad se Ahmed aur Ahmed se Tujh ko
 Kun aur sab kun makun haasil hai Ya Gaus
 Teri Izzat, teri rif'at, tera fazl
 Bifazlihi afzal o faazil hai Ya Gaus
 Tu barzakh hai barang e noon e minnat
 Do jaanib muttasil waasil hai Ya Gaus
 Nabi se aakhiz aur Ummat pe faaiz
 Udhar qaabil Idhar faa'il hai Ya Gaus
 Ajam kaisa Arab, Hil kya Haram mein
 Jami har jaa teri mehfil hai Ya Gaus
 Teri Qudrat to fitriyat se hai
 Ke qaadir naam mein daakhil hai Ya Gaus
 Tasarruf waale sab mazhar haiñ tere
 Tu hi is parde mein faa'il hai Ya Gaus
RAZA ke kaam aur ruk jaayein haasha
 Tera saail hai tu baazil hai Ya Gaus

BADAL YA FARD JO KAAMIL HAI

Badal ya fard jo kaamil hai Ya Gaus
 Tere hi dar se mustakmil hai Ya Gaus
 Jo teri yaad se zaahil hai Ya Gaus
 Wo Zikrullah se gaafil hai Ya Gaus
 Sukhan haiñ asfiya tu magz, ma'ana
 Badan haiñ auliya tu dil hai Ya Gaus
 Agar wo jism e Irfaan haiñ to tu Aankh
 Agar wo aankh haiñ tu til hai Ya Gaus

Uluhiyyat Nubuwwat ke siwa tu
 Tamaam afzaal ka qaabil hai Ya Gaus
 Nabi ke qadmoñ par hai juz Nubuwwat
 Ke khatm is raah mein haail hai Ya Gaus
 Uluhiyyat hi Ahmed ne na paayi
 Nubuwwat hi se tu 'aatil hai Ya Gaus
 Sahabiyyat huwi phir Taab'iyyat
 Bas aage Quadri manzil hai Ya Gaus
 Hazaaron Taabi'ee se tu fazoon hai
 Wo tabqa mujmalan Faazil hai Ya Gaus
 Ye Chishti Soharwardi Naqshbandi
 Har ek teri taraf maa'il hai Ya Gaus
 Teri chidiyaan haiñ tera daana paani
 Tera mela Teri mehfil hai Ya Gaus
 Tere khuddaam ke aage hai ek baat
 Jo aur aqtaab ko mushkil hai Ya Gaus
 Sitam kori wahaabi raafzi ki
 Ke hindu tak tera qaail hai Ya Gaus
 Wo kya jaane ga Fazl e Murtaza ko
 Jo tere fazl ka jaahil hai Ya Gaus
 RAZA ke saamne ki taab kis mein
 Falakwaar us pe tera zil hai Ya Gaus

TALAB KA MUÑH TO KIS QAABIL HAI

Talab ka muñh to kis qaabil hai Ya Gaus
 Magar tera karam kaamil hai Ya Gaus
 Duhaai Ya Muhiyyaddeen duhaai
 Balaa Islaam par naazil hai Ya Gaus
 Wo sangeen bid'atein wo tezi e kufr
 Ke sar par teg dil par sil hai Ya Gaus
 Khudaara naakhuda aa de sahaara
 Hawaa bigdi bhañwar haail hai Ya Gaus
 Jila de deen jalaa de kufr o ilhaad
 Ke tu muhyee hai tu qaatil hai Ya Gaus

Tera waqt aur pade yuñ deen par waqt
 Na tu aajiz na tu gaafil hai Ya Gaus
 Rahi haan shaamate aamaal ye bhi
 Jo tu chaahе abhi zaail hai Ya Gaus
 Gayura apni gairat ka tasadduq
 Wahi kar jo tere qaabil hai Ya Gaus
 Khudaara marhame khaake qadam de
 Jigar Zakhmi hai dil ghaail hai Ya Gaus
 Na dekhuñ shakle mushkil tere aage
 Koi mushkil si ye mushkil hai Ya Gaus
 Tu quwwat de main tanha kaam bisyar
 Badan kamzor dil kaahil hai Ya Gaus
 Adoo bad-deen mazhab wale haasid
 Tuhi tanha ka zor e dil hai Ya Gaus
 Hasad se un ke seene paak karde
 Ke badtar diq se bhi ye sil hai Ya Gaus
 Diya mujh ko Unhein mehroom chhoda
 Mera kya jurm haq faasil hai Ya Gaus
 Khuda se lein ladaai wo hai mo'ati
 Nabi qaasim hai tu musil hai Ya Gaus
 Ataayein muqtadir Gaffaar ki haiñ
 Abas bandoñ ke dil mein gil hai Ya Gaus
 Tere baba ka phir tera karam hai
 Ye muñh warna kisi qaabil hai Ya Gaus
 Bharan wale tera jhaala to jhaala
 Tera Chheenā mera gaasil hai Ya Gaus
 Sana Maqsood hai Arz e Garaz kya
 Garaz ka aap to kaafil hai Ya Gaus
 RAZA ka khaatima bil khair hoga
 Teri Rehmat agar shaamil hai Ya Gaus

KA'ABA KE BADRUDDUJA TUM PE KAROROÑ DUROOD

Ka'aba ke badrudduja Tum pe Karoroñ Durood
Taiba ke shamsudduha Tum pe Karoroñ Durood

Shaafa'e roz e jazaa Tum pe Karoroñ Durood
Daafa'e Jumla balaa Tum pe Karoroñ Durood

Aur koi gaib kya tum se nihaañ ho bhalaa
Jab na khuda hi chhupa Tum pe Karoroñ Durood

Dil karo thanda mera wo kafe paa chaand sa
Seene pe rakh do zaraa Tum pe Karoroñ Durood

Zaat huwi intekhaab wasf huwe laajawaab
Naam huwa Mustafa Tum pe Karoroñ Durood

Wo shabe me'araaj raaj wo saf e mehshar ka taaj
Koi bhi aisa huwa Tum pe Karoroñ Durood

Be-hunar o be tameez kis ko huwe haiñ azeez
Ek tumhare siwa Tum pe Karoroñ Durood

Aas hai koi na paas ek tumhari hai aas
Bas hai yahi aasraa Tum pe Karoroñ Durood

Tum ho shifa e maraz khalqe khuda khud garaz
Khalq ki haajat bhi kya Tum pe Karoroñ Durood

Seenah ke hai daag daag kehdo kare baag baag
Taiba se aakar saba Tum pe Karoroñ Durood

Khalq ke haakim ho tum rizq ke qaasim ho tum
Tum se mila jo mila Tum pe Karoroñ Durood

Barse karam ki bharan phooleiñ ne'am ke chaman
Aisi chala do hawaa Tum pe Karoroñ Durood

Kyuuñ kahooñ bekas hooñ maiñ kyuñ kahooñ bebas hooñ maiñ
Tum ho maiñ tum par fida Tum pe Karoroñ Durood

Girne ko hooñ rok lo gota lage haath do
Aisoñ par aisi ataa Tum pe Karoroñ Durood

Apne khataawaaron ko apne hi daaman meiñ lo
Kaun kare ye bhalaa Tum pe Karoroñ Durood

Karke tumhaare gunaah maañgeiñ tumhaari panaah
Tum kaho daaman meiñ aa Tum pe Karoroñ Durood

Kardo adoo ko tabaah haasidoñ ko ru baraah
Ahle wila ka bhalaa Tum pe Karoroñ Durood

Hum ne khataa meiñ na ki tum ne ataa meiñ na ki
Koi kami sarwara Tum pe Karoroñ Durood

Kaam gazab ke kiye us pe hai Sarkaar se
Bandoñ ko chashme Raza Tum pe Karoroñ Durood

Aañkh ataa kijiye us meiñ ziya dijiye
Jalwa qareeb aagaya Tum pe Karoroñ Durood

Kaam wo le lijiye Tum ko jo raazi kare
Theek ho Naam e **RAZA** Tum pe Karoroñ Durood

MUSTAFA JAAN E REHMAT

Mustafa Jaan e Rehmat pe Laakhoñ Salaam
Sham'e Bazm e Hidaayat pe Laakhoñ Salaam

Mehr e charkhe nubuwat pe raushan durood
Gul e baag e Risaalat pe Laakhoñ Salaam

Shab e Asra ke Doolha pe daaim Durood
Naushah-e Bazme Jannat pe Laakhoñ Salaam

Jis ke zere liwa Aadam o Mansiwa
Us Saza e Siyaadat pe Laakhoñ Salaam

Fat-he baabe Nubuwwat pe behad durood
Khatm e daur e Risaalat pe Laakhoñ Salaam

Hum Gariboñ ke Aaqā pe behad durood
Hum Faqeeroñ ki Sarwat pe Laakhoñ Salaam

Jis ke aage sar e sarwaraañ kham raheĩñ
Us sar-e Taaj e Rif'at pe Laakhoñ Salaam

Jis ke Maathe Shafa'at ka sehra raha
Us Jabeen e Sa'aadat pe Laakhoñ Salaam

Jis taraf uth gayi dum mein dum aa gaya
Us Nigaah e Inaayat pe Laakhoñ Salaam

Jis se taareek dil jagmagaane lage
Us chamak wali rangat pe Laakhoñ Salaam

Wo Dahan jis ki har baat wahi e khuda
Chashma e Ilm o Hikmat pe Laakhoñ Salaam

Wo Zabaañ jis ko sab Kun ki Kunji kaheĩñ
Us ki Naafiz Hukoomat pe Laakhoñ Salaam

Jis ki Taskeẽ se rote huwe hañs pade
Us Tabassum ki Aadat pe Laakhoñ Salaam

Jis ko baar e do Aalam ki parwaah nahiñ
Aise Baazu ki Quwwat pe Laakhoñ Salaam

Kul jahaañ milc aur jau ki roti giza
Us Shikam ki Qana'at pe Laakhoñ Salaam

Khaayi Qur'aan ne Khaak e Guzar ki Qasam
Us kaf e paa ki Hurmat pe Laakhoñ Salaam

Jis suhaani ghadi chamka Taiba ka Chaañd
Us Dil Afroz Saa'at pe Laakhoñ Salaam

Gaus e Aazam Imamuttuqa Wannaqa
Jalwa e Shaan e Qudrat pe Laakhoñ Salaam

Ek mera hi Rehmat mein da'awa nahiñ
Shaah ki saari Ummat pe Laakhoñ Salaam

Kaash mehshar mein jab Un ki Aamad ho aur
Bhejeĩñ sab Un ki Shaukat pe Laakhoñ Salaam

Mujh se khidmat ke qudsi kaheĩñ haañ **RAZA**
Mustafa Jaane Rehmat pe Laakhoñ Salaam

ZAMEEN O ZAMAAÑ

Zameen o Zamaañ Tumhare liye makeen o makaañ Tumhare liye
Chuneeno chunaañ Tumhare liye bane do jahaañ Tumhare liye

Dahan mein zubaan Tumhare liye badan mein hai jaañ Tumhare liye
Hum aaye yahaan Tumhare liye uthe bhi wahaan Tumhare liye

Farishte khidam Rasool e Hisham tamaam e umam gulaam e karam
Wujood o adam Hudoos o Qidam jahaan mein iyaañ Tumhare liye

Kaleem o Naji, Maseeh o Safi, Khaleel o Razi, Rasool o Nabi
Ateeq o Wasi Gani o Ali Sana ki Zubaañ Tumhare liye

Asaalat e kul Imaamat e kul Siyaadat e kul Imaarat e kul
Hukoomat e kul Wilaayat e kul khuda ke yahaan Tumhare liye

Tumhari Chamak Tumhari Damak Tumhari Jhalak Tumhari Mahek
Zameen o Falak Samaak o Samak mein sikka nishaañ Tumhare liye

Ye Shams o Qamar ye Shaam o Sahar ye Barg o Shajar ye Baag o Samar
Ye Teg o Sipar ye Taaj o Kamar ye Hukm-e-Rawaañ Tumhare liye

Ye Faiz diye wo Jood kiye ke Naam liye Zamaana jiye
Jahaan ne liye Tumhare diye ye Akramiyaañ Tumhare liye

Sahaab e Karam rawaana kiye ke Aab e ne'am zamaana piye
Jo rakhte the hum wo chaak siye ye satr e badaañ Tumhare liye

Ata e arab jila e karab fuyooz e ajab bagair e talab
Ye Rehmat e Rab hai kis ke sabab Birabb e Jahaan Tumhare liye

Na Rooh e Ameer na Arsh e Bareen na loh e mubeen koi bhi kaheen
Khabar hi nahi jo ramzein khuleen azal ki nihaan tumhare liye

Jinaan mein chaman, chaman mein saman, saman mein phaban, phaban mein dulhan
Saza e mihan pe aise minan ye amn o amaan Tumhare liye

Khaleel o Naji, Maseeh o Safi sabhi se kahi kaheen bhi bani
Ye be khabari ke khalq phiri kahaan se kahaan Tumhare liye

Ye marhamatein ke kachhi matein na chhodiin latein na apni gatein
Qusoor karein aur un se bharein Qusoor e jinaan Tumhare liye

Fanaa badarat baqaa babarat ze har do jahat bagirde sarat
Hai markaziyat tumhari sifat ke dono kamaan Tumhare liye

Ishaar-e se chaand cheer diya chhupe huwe khur ko pher liya
Gaye huwe din ko asr kiya ye Taab o Tawaan Tumhare Liye

Saba wo chale ke baag phale wo phool khile ke din hon bhale
Liwa ke tale sana mein khule **RAZA** ki zubaa Tumhare liye

NAZAR EK CHAMAN SE DO CHAAR HAI

Nazar ek chaman se do chaar hai na chaman chaman bhi nisaar hai
Ajab us ke gul ki bahaar hai ke bahaar e bulbul e zaar hai

Na dil e bashar hi figaar hai ke malak bhi us ka shikaar hai
Ye jahaa ke hezdah hazaar hai jise dekho us ka hazaar hai

Wo hai bheeni bheeni wahaa mahek ke basaa hai arsh se farsh tak
Wo hai pyari pyari wahaa chamak ke wahaa ki shab bhi nihaar hai

Wahi jalwa shaher bashaher hai wahi asl-e aalam o dahr hai
Wahi baher hai wahi laher hai wahi paat hai wahi dhaar hai

Wo na tha to baag mein kuchh na tha wo na ho to baag ho sab fanaa
Wo hai jaan, jaan se hai baqaa wahi bun hai bun se hi baar hai

Ye adab ke bulbule be nawaa kabhi khul ke kar na sak-e nawaa
Na sabaa ko tez rawish rawaa na chhalakti nehron ki dhaar hai

Ba adab jhukaalo sar e vila ke main naam loon gul o baag ka
Gul e tar Mohammed Mustafa chaman un ka paak dayaar hai

Wahi aakh un ka jo munh tak-e wahi lab ke mahw hon naat ke
Wahi sar jo un ke liye jhuke wahi dil jo un pe nisaar hai

Jise teri saffe na'aal se mil-e do niwale nawaal se
Wo banaa ke us ke ugaal se bhari sultanat ka udhaar hai

Wo uthein chamak ke tajalliyaan ke mita deen sab ki ta'alliyaan
Dil o jaan ko bakhshen tasalliyaan tera noor baar e dohaar hai

Rusul o malak pe durood ho wahi jaane un ke shumaar ko
Magar ek aisa dikha to do jo shafee-e-roz e shumaar hai

Gunahe **RAZA** ka hisaab kya wo agar che laakhon se hai siwa
Magar aye afu tere afwa ka na hisaab hai na shumaar hai

Tere deen e paak ki wo ziya ke chamak uthi rah e istefa
Jo na maane aap saqar gaya kahi noor hai kahi naar hai

Koi jaan bas ke mahek rahi kisi dil mein us se khatah rahi
Nahi us ke jalwe mein yak rahi kahi phool hai kahi khaar hai

Wo jise wahaabiya ne diya hai laqab shaheed o zabeeh ka
Wo shaheed e laila e najd tha wo zabeeh e teg e khiyaar hai

Ye hai deen ki taqwiyat us ke ghar ye hai mustaqeem sirat e shar
Jo shaqi ke dil mein hai gaao khar to zabaa pe chaurdha chamaar hai

Wo habeeb pyara to umr bhar karey faiz o jood hi sar basar
Arey tujh ko khaaye tap e saqar tere dil mein kis se bukhaar hai

Wo **RAZA** ke neza ki maar hai ke adu ke seena mein gaar hai
Kise chara joi ka waar hai ke ye waar waar se paar hai

ZARRE JHAD KAR TERI PAIZARON KE

Zarre jhad kar teri paizaaron ke

Taaj e sar bante haiin saiyaaron ke

Hum se choroñ pe jo farmaayein karam

Khil'at e zar banein pishtaaron ke

Mere aaqa ka wo dar hai jis par
 Maathe ghis jaate haiñ Sardaroñ ke
 Mere Isaa tere sadqe jaoñ
 Taur be taur haiñ beemaroñ ke
 Mujrimo! chashme tabassum rakho
 Phool ban jaate haiñ angaroñ ke
 Jaan o dil tere qadam par waare
 Kya naseebe haiñ tere yaaroñ ke
 Sidq o adl o karam o himmat mein
 Chaar soo shohre haiñ in charoñ ke
 Behr e tasleeme Ali maidaañ mein
 Sar jhuke rehte haiñ talwaroñ ke
 Kaise aaqaoñ ka banda hooñ **RAZA**
 Bol baale meri Sarkaroñ ke

SAR SOOYE RAUZA JHUKA

Sar sooye rauza jhuka phir tujh ko kya
 Dil tha saajid najdiya phir tujh ko kya
 Baith-te uth-te madad ke waaste
 Ya Rasoolallah kaha phir tujh ko kya
 Be khudi mein sajda e dar ya tawaaf
 Jo kiya achha kiya phir tujh ko kya
 Un ko tamleek-e-maleekul mulk se
 Maalik e aalam kaha phir tujh ko kya
 Un ke naam e paak par dil jaan o maal
 Najdiya sab tajdiya phir tujh ko kya
 Ya *Ibaadi* keh ke hum ko shaah ne
 Apna Banda kar liya phir tujh ko kya
 Dev ke bandoñ se kab hai ye khitaab
 Tu na un ka hai na tha phir tujh ko kya

Najdi martaa hai ke kyuñ taazeem ki
 Ye hamara deen tha phir tujh ko kya
 Dev tujh se khush hai phir hum kya kareñ
 Hum se raazi hai khuda phir tujh ko kya
 Dev ke bandoñ se humko kya garaz
 Hum haiñ Abd e Mustafa phir tujh ko kya
 Teri dozakh se to kuchh chheena nahiñ
 Khuld mein pahuncha **RAZA** phir tujh ko kya

WAHI RAB HAI JIS NE TUJH KO

Wahi Rab hai jis ne tujhko hama tan karam banaaya
 Hamein bheek maañgne ko tera aataañ bataya
 Tujhe Hamd hai khudaya

Tumhiñ Haakim e Baraya tumhi Qaasim e Ataaya
 Tumhiñ daafa e balaya tumhi shaafa e khataaya
 Koi tum sa kaun aaya

Woh kuñwaari paak mariyam woh *nafakhtu feehi* ka dum
 Hai ajab nishaan e aazam magar aamina ka jaaya
 Wahi Sab se afzal aaya

Yahi bole sidrah wale chaman e jahaañ ke thaale
 Sabhi maine chhaan daale tere paaye ka na paaya
 Tujhe ek ne ek banaya

Arey aye khuda ke bando! koi mere dil ko dhuñdo
 Mere paas tha abhi to abhi kya huwa khudaya
 Na koi gaya na aaya

Hamein aye **RAZA** tere dil ka pataa chala bamushkil
 Dar e rauza ke muqaabil wo hamein nazar to aaya
 Ye na poochh kaisa paaya

MUSTAFA JAAN E REHMAT

Mustafa Jaan e Rehmat pe Laakhoñ Salaam
Sham'e Bazm e Hidaayat pe Laakhoñ Salaam

Shab e Asra ke Doolha pe daaim Durood
Naushah-e Bazme Jannat pe Laakhoñ Salaam

Hum Gariboñ ke Aaqā pe behad durood
Hum Faqeerōñ ki Sarwat pe Laakhoñ Salaam

Jis ke Maathe Shafa'at ka sehra raha
Us Jabeen e Sa'aadat pe Laakhoñ Salaam

Jis taraf uth gayi dum mein dum aa gaya
Us Nigaah e Inaayat pe Laakhoñ Salaam

Jis se taareek dil jagmagaane lage
Us chamak wali rangat pe Laakhoñ Salaam

Wo Zabaañ jis ko sab Kun ki Kunji kahein
Us ki Naafiz Hukoomat pe Laakhoñ Salaam

Jis ki Taskeen se rote huwe hañs pade
Us Tabassum ki Aadat pe Laakhoñ Salaam

Gaus e Aazam Imamuttuqa Wanaqa
Jalwa e Shaan e Qudrat pe Laakhoñ Salaam

Hind ke baadshah deen ke woh mein
Khwaja-e-Deen o millat pe Laakhoñ Salaam

Mujh se khidmat ke qudsi kahein haañ **RAZA**
Mustafa Jaane Rehmat pe Laakhoñ Salaam

Sab se Aula wa Aala hamara Nabi
Sab se Baala wa Wala hamara Nabi

Apne maula ka pyara hamara Nabi
Donoñ aalam ka doolha hamara Nabi

Bujh gayiñ jis ke aage sabhi mash'aleiñ
Sham'a wo lekar aaya hamara Nabi

Jis ke talwoñ ka dhowan hai aab e hayaat
Hai wo jaane maseeha hamara Nabi

Khalq se Auliya, Auliya se Rusul
Aur Rasooloñ se Aala hamara Nabi

Jis ki do boond hai kausar o salsabeel
Hai wo rehmat ka dariya hamara Nabi

Jaise sab ka Khuda ek hai waise hi
Inka unka tumhara hamara Nabi

Kaun deta hai deneko muñh chahiye
Dene wala hai sachcha hamara nabi

Sab chamak wale ujloñ mein chamka kiye
Andhe Sheeshoñ mein chamka hamara Nabi

Gamzadoñ ko **RAZA** muzda dije ke hai
Bekasoñ ka sahara hamara Nabi